

MAZMUR

LESOAM UHUNA:

MAZMUR 1--41

Lingkana to malolo gau' anna lingkana to tama'Debata

1:1-6

- 1** ¹Maupa' anna katambasam hupatau
to tä' muola lalanna to tama'Debata,
tä' pada ke'de' to madosa,
anna tä' pada isu' to mantelle,
²sapo' umpohhä'di' Paondom DEBATA,
anna napasalui penaba allo bengi.
- ³Tau ia too sihhapam kaju ditanam dio handam salu,
si kembua ke lambi' oom wattunna,
anna tä' deem malasso daunna,
ingganna pattujunna sule lako asam.^a
- ⁴Sapo' tä' ia susi to tama'Debata:
sihhapam ia pa'tappiam naliliam hibu'.
- ⁵La susim too to tama'Debata' la napassala Puang Allataala,
susi siam duka' to madosa tä' la mentama alla'-alla'na to malolo
gau'.
- ⁶Aka lingkana to malolo gau' naundu' anna napatette DEBATA,
sapo' lingkana to tama'Debata tinanda ia lako kamateam.

Tomahaja to nalanti' Puang Allataala

2:1-12

- 2** ¹Aka hia anna ma'pattujui la pabali-bali ingganna kahajaam,
akanna umpemandannii kaha-kaha labu' ma'hupatau?
- ²Mengke'de' mentu'na tomahaja di lino
anna ungkalebui tula' ingganna to kasalle
umbali DEBATA anna tomahaja to nalanti'.
- ³Silele ma'kada naua:
"Tapolo-poloia' sangkalana
anta kattu-kattua' pepungona lako kaleta!"
- ⁴Metaba la'ba DEBATA to untadongkonni suhuga;
napelale'i pattujunna.
- ⁵Mane nakissä'i sitonda aha'
anna natibuhesei sola aha' kasalleNa naua:
- ⁶"Puham kulanti' tomahaja to kupilei
yabo Sion tanete masehoKu!"

^a1:3 Yer. 17:8

- ⁷ La kupa'paissangam kada napandam DEBATA;
ma'kada lako kaleku naua: "Ikom too änä'Ku!
Allo temo, Kaom too Ambemu.
- ⁸ Pelauko mai,
anna mala kubeengko ingganna kahajaam mendadi mana'mu,
anna kupadokkoangko lisu pala'mu lino sitonda issinna.
- ⁹ Sumambu bassi la umpake umpolo-polo balimmu,
anna la uhhuppu'-huppu' susi kuhim litä'."
- ¹⁰ Dadi pengkakeaka'ko, o inggammua' tomahaja,
pa'pehingngiko, o inggammua' to ma'pahenta di lino!
- ¹¹ Pengkahea'ko menomba längäm DEBATA,
anna pengkadioko tilalla' dio oloNa,
- ¹² pa'balinguntu'ko menomba dio oloNa, anna mala tä'ko
napempa'deam säkä-säkä,
aka si masimpam kende' aha' kasalleNa.

Maupa' anna katambasam to mentuhehum lako DEBATA!

Sambajam mebengngi' muoloi bali

3:1-9

- 3** ¹ Mazmur napapia Daud, wattunna le'ba' muäläi kalena umpellei
Absalom änä'na.
- ² O DEBATA, tä' deem pada sabuda balingku!
Buda punala tau mengke'de' umbundu'ä'!
- ³ Buda tau muuai:
"Tä' napesäkäi Puang Allataala." Sela^b
- ⁴ Sapu' Iko, o DEBATA, unta' matoto'ku to umpa'tippasannä',
Iko muangkahannä' anna umpasule sumanga'ku umpaende'
pahajangu.
- ⁵ Metambää' mengkaala längäm DEBATA,
anna nahingngiam pelauangu yabo mai tanete masehoNa. Sela
- ⁶ Umbehesannä' kaleku angku mamma';
anna bangonnä' masannam, aka naundu'ä' DEBATA!
- ⁷ Tä' mahea'ä' lako massa'bu-sa'bu bali,
sule natalimbum tamaä' la nabundu'.
- ⁸ O DEBATA, pengke'de'ko,
o Puang Allataala to kupenombai, pesäkäiä'!
Puham ussappaam papam sädäna balingku,
anna umpompaiam tandu' masadi'na to tama'Debata.
- ⁹ Pepamolo buttu yabo mai DEBATA.
Handandanni Iko untamba' umma'Mu! Sela

^b **3.3** Sela: Mesa kada illaam basa Ibrani biasa si dipake illaam Suha' Mazmur, sapo' tä' makaleso gege kalembasanna. Umbai' mesa tula' si dipake illaam penaniam susi toi duka' si dipake illaam hettem kapenombaam lako DEBATA, battu haka kalembasanna "la tohho tau sapäi' mellube dipikki', dipasalui penabana anna dipenabaam."

Sambajam wattu bengi

4:1-9

- 4**¹ Lu lako to untetem to menani. Penaniam dikatapii. Mazmur napapia Daud.
- ² O Puang Allataala, to umpomaloloä',
timba'ia' ke mengkaalaä' matim.
Illaam kamasippisangku umpatialeannä inabangku.
Häntängannä' bua anna hingngianni sambajangku!
- ³ O inggammua' hupatau, la pihampi mane mondakoa' umpalele kadake sanga mapiangku?
La pihampi mane mondakoa' umpadondoi kaha-kaha takeguna,
anna sipanggula' kaha-kaha tatappa'? Sela
- ⁴ Pengngissannia', puham napileiam kalena DEBATA indo to napakamaja.
Nahingngiam DEBATA ke mengkaalaä' längäm oloNa.
- ⁵ Pabäiko keaha', sapo' daa umpogau' dosa;
pasalui penaba dio petindoammu, sapo' la mengkamma' pudu'mu.
Sela
- ⁶ Pehumalasangko bua pemala' la sipäto'na
anna matappa'ko längäm DEBATA.
- ⁷ Buda tau mekutana naua: "Menna la umpaitaikia' kamapiaam?"
La unnenne'i hakam too DEBATA, sola mata pa'kamaseMu!
- ⁸ Puhangko umpaponnoiä' katilallasam,
la'bi puha ia anna la katilallasanna to bosa' gandum anna anggur.
- ⁹ Masannam penabangku metindo lambi' mamma',
aka Iko DEBATA, umpadadiä' tubo malino masannam.

Sambajam wattu mebengngi'

5:1-13

- 5**¹ Lu lako to untetem to menani. Penaniam dipa'sulinni. Mazmur napapia Daud.
- ² O DEBATA, patanannii talinga pa'tula'ku,
pehingngii pengkaloa'ku.
- ³ O Tomahajangku anna Puang Allataala to kupenombai,
hingngianni pengkaalangku umpelau pepamolo,
aka Iko kupa'patinandai sambajangku.
- ⁴ O DEBATA, wattu mebengngi' si uhhingngiangko sambajangku,
wattu mebengngi' umpatokaä' kaleku la mengngolo matim,
anna kuampai pentimba'Mu.
- ⁵ Aka Iko Puang Allataala to ungnabassi kakadakeam;
tä'Ko deem la nalese' to tama'Debata.
- ⁶ Tä' la umpabäi to malangka' penaba sule dio oloMu;
ungknabassiKo ingganna to umpogau' kakadakeam.

- ⁷ Umpempa'deangKo to angga ma'tula' tatappa',
ungkahi'di'Ko to papateam anna to manipu.
- ⁸ Sapo' kao-kao, aka kasalle pa'pakamajamMu tamalele,
la malaä' mentama banuamMu,
menomba dio olona ongeam masehoMu
sola mengkahea' dio oloMu.
- ⁹ O DEBATA, patetteä' uhhuttu' kamaloloamMu
aka nalilim pali'ä' balingku;
hampasannä' lalamMu la kuola.
- ¹⁰ Aka tä' punala deem mala dikatappa'i pa'kadanna,
silele ponno pattuju kadake illaam penabanna,
angga umpikkisam katilakaam tau senga',
senga' dio pudu'na senga' illaam tambu'na.
- ¹¹ O Puang Allataala, pabäi sangngim umpendudum kasalaanna;
pabäi natappai pa'lellenna;
hambai lao aka makambammi kasalaanna,
aka silele napobaliKo.
- ¹² Sapo' la ussi'dim ia katilallasam ingganna to mentuhehum matim,
la sikaahhe tilalla' sule lako salako-lakona, aka Iko muongannii;
la naponnoi katilallasam ingganna tau to ungkamasei sangamMu,
aka indo pa'pogausamMu lako kalena.
- ¹³ Aka Iko untamba' to malolo gau', DEBATA;
mana' pa'kamaseMu uhhindim batui, muunta' matoto'i.

Sambajam illaam kamasussaam

6:1-11

- 6** ¹ Lu lako to untetem to menani. Penaniam dikatapii. Katapi kahua
hitinna. Mazmur napapia Daud.
- ² O DEBATA, illaam aha'Mu daa untappakadaä',
illaam aha' kasalleMu daa umpassalaä'.
- ³ Kamaseiä' DEBATA, aka kangahe-ngaheä';
pomaläpu'ä', aka malu'bä'um bukungku,
- ⁴ anna husa' penabangku.
O DEBATA, la pada hia umba masäena umpemboko'ia'?
- ⁵ Pa'pasulengko DEBATA, langnga'ia',
lappasannä' aka pa'pakamajamMu tamalele.
- ⁶ Aka tä'ungko deem la dikilalai ke matem tau;
mennapi la umpujiKo dio kaliiane anitu?
- ⁷ Takubelam maaka napobua' pengkaloa'ku;
bengi-bengiam si limbä allongangku,
bungenge' petindoangku napobua' uwai matangku.
- ⁸ Bongom matangku aka mapi'di' penabangku,
makuhibo-hibo pennenne'ku napobua' balingku.
- ⁹ Le'ba'koa' lao inggammua' to umpogau' kakadakeam,

- aka nahingngiammi DEBATA sahhoku;
¹⁰ nahingngiammi pelauangku,
 anna natahimam sambajangku.
¹¹ Sangngim mahea' balingku anna masihi';
 silelei ma'pasule kapui'-pui' malea lindo.

Puang Allataala To Mahhotto' handam malolo

7:1-18

- 7** ¹ Penanianna Daud längäm DEBATA, aka napomasussa Kush
 pessubunna Benyamin.
- ² O DEBATA, Puang Allataala to kupenombai, Iko pentuhehungangku;
 pesäkää' ammu lappasannä'
 dio mai ingganna to umpadondoä'.
- ³ Daa umpabäi balingku la susi singa,
 nasepä'-sepä'ä' anna nabiti'-biti',
 anna tä' deem to la ullappasannä'.
- ⁴ O DEBATA, Puang Allataala to kupenombai, maka' deem kupogau'
 kaha-kaha susi indee:
 hapanna la deem sala tappaam limangku,
- ⁵ hapanna la deem kupabala'i kakadakeam gau' mapianna to mapia
 penaba lako kaleku,
 battu haka la unghaha'i bäbää' balingku tä' deem lalanna,
- ⁶ iya pabäi mammi napadondoä' balingku anna nasakka,
 napa'ku'nä' anna napa'lullu' dokko litä', lambi' pa'de hapammä'
 anna takeangga'. Sela
- ⁷ O DEBATA, pengke'de'ko sola aha' kasalleMu,
 ebai pa'dallo'na balingku.
 Pekkalundangko ammu pamoloiä',
 aka Iko to unte'geham kamaloloam!
- ⁸ Patipungngu'i ingganna hupatau nalilingKo,
 ammu pahe'i yabo mai ongeam kamatandeamMu.
- ⁹ Iko DEBATA to mahhotto'na ingganna kahajaam;
 hotto'ä' DEBATA, situhu' kamaloloangku,
 anna situhu' kamahändängam penabangku.
- ¹⁰ Popeanggam pa'pogausam kadakena to tama'Debata,
 anna pomatohoanni penabanna ingganna to malolo gau',
 Iko Puang Allataala to muundu' lollä,
 to ullosa tama penabanna anna pikkihanna hupatau.
- ¹¹ Puang Allataala unta' matoto'ku,
 to ullangnga'i to malolo penaba;
- ¹² Puang Allataala to si muundu' lollä umpopa'tadongkongam hupatau,
 anna Puang Allataala tamonda aha'Na.
- ¹³ Maka' tä' muondo' gau'na to kadake gau', iya muasam pa'danNa
 Puang Allataala anna umpasammi bälä'du'Na;

- ¹⁴ umpatokam pangkakka' la mepatei;
la umpa'tembasammi batu bälä'du'Na lekke' api.
- ¹⁵ Pehingngiia! Tau kadake umpangngidengam kakadakeam;
ungkebättängam kamakahhasam, anna unddiam kakalasiyam.
- ¹⁶ Umbo'bäsam tolombu tau senga',
sapo' ia hi tilika' dokko.
- ¹⁷ Dadi natappai pa'lellenna,
anna nakumbali' kamakahhasanna.
- ¹⁸ Ma'kuhhu' sumanga'ä' längäm DEBATA, aka Ia to malolo illaam
ingganna-ingganna sia,
anna umpenaniannä' pampujiam längäm sanganNa DEBATA, To
Handam Matande.

KamatandeanNa Puang Allataala anna kakuasaanna hupatau

8:1-10

- 8** ¹ Lu lako to untetem to menani. Situhu' ajanganna penaniam: Gitit.
Mazmur napapia Daud.
- ² O DEBATA, Debata to kipenombai,
tä' deem pada samapuam sangamMu illaam inde lino!
Dipenaniam kamatandeamMu to untandolängänni langi'.
- ³ Kamahanna änä'-änä' sola änä'-änä' sumusu umpadadi kamatohoam
DEBATA, lako balimMu,
la umpopa'luttu' ingganna bali sola to ma'patumpui.
- ⁴ Maka' kupetua' anna kupasalui penaba langi' kalua' pa'tampa
limamMu,
bulam sola ingganna bintä to umpatadongkonni ongeanna,
- ⁵ iya mekutanamä' kuua, aka ia inde hupatau, DEBATA, nasuhum
umpaillaam penaba?
Menna hia inde ma'hupatau, DEBATA, nasuhum muandaham mata
liu?
- ⁶ Umpadadi hi kamala sipadaam Puang Allataala,
anna umpatadongkom yabo ongeam matande anna malangka'.
- ⁷ Umbeem kakuasaam yabona ingganna pa'padadimMu,
umbeem kakuasaam la unguasai ingganna-ingganna sia,
susinna:
- ⁸ domba, sola sapim,
anna duka' olo'-olo' lako kaliane;
- ⁹ dassi yabo lawwa, anna bau dio le'bo',
sola issinna ingganna le'bo' kalua'.
- ¹⁰ O DEBATA, Debata to kipenombai,
tä' deem pada samapuam sangamMu illaam inde lino!

DEBATA too'na kamaloloam

9:1-10:18

- 9** ¹ Lu lako to untetem to menani. Situhu' ajanganna penaniam
Mut-Laben. Mazmur napapia Daud.

- ²O DEBATA, la ma'kuhhu' sumanga'ä' matim sola sakalebu penaba,
anna la kupa'paissangam indo pa'pogausamMu memängä-mängä.
- ³La kassiä' anna tilalla' aka Iko nasuhum, DEBATA,
anna menaniä' umpuji sangamMu, o To Handam Matande.
- ⁴Silele soho' boko' balingku dio oloMu;
titedo songka, anna tissämbä' mate.
- ⁵Aka Iko ungkattui muua, hua pa'palakoanna Daud,
tadongkongKo yabo ongeam kamatandeamMu muundu' lollä.
- ⁶PuhangKo umpassala ingganna kahajaam senga',
anna umpempa'deam ingganna to tama'Debata;
tala dipaalaim ia suhi' sanganna sule lako salako-lakona.
- ⁷Tappu' asammi balingki umpempa'deam,
tala mehä'dä'pi tala meata,
puha asammi kotana, uhhuppu' umpadahi täiabu;
tala nainga'pi tala nasalili ma'hupatau.
- ⁸Sapo' ma'kuasa Ia DEBATA sule lako salako-lakona;
umpakatoto' okkosam kahajaanNa, la naongi uhhotto' ma'tanda
to lino.
- ⁹Umpopa'tadongkongam ma'hupatau sola undu' lollä',
uhhotto' ma'tanda to lino sola kamaloloam.
- ¹⁰Susim too DEBATA bettem matoto'na to didahha,
hindim batunna to illaam kamasippisam.
- ¹¹To muissam sangamMu DEBATA mahannu matim,
aka tä'Ko untampeam to umpameäKo.
- ¹²Penanikoa' umpuji DEBATA,
DEBATA to untadongkonni Sion!
Pa'pakahebaanni pa'pogausanNa lako ingganna kahajaam!
- ¹³Aka umpaillaam penaba liu to dipakahio-hio,
anna tä' napehingngi-hingngii bäbä pengkaloa'na;
si unpahuai pa'tahungkungam lako to papateam.
- ¹⁴O DEBATA, kamaseiä';
petua'i, nadahha'ä' balingku,
langnga'ia' dio mai ba'ba pambo'bä',
- ¹⁵anna mala kupa'pakahebaam ingganna pa'pogausam mapiamMu,
sola kakassiam anna katilallasam dio ba'bana kota Sion,^c
aka ullangnga'ia' dio mai kamateam.
- ¹⁶Ingganna kahajaam mehonno' dokko to lombunna,
naala uläna, nasakka pojana.
- ¹⁷DEBATA umpa'paissangam kaleNa, tandaam illaam pahhottosanNa
sola undu' lollä;
to tama'Debata, tappa tama lunu'na pa'battana, natappai
pa'lellenna. Higayon.^d Sela
- ¹⁸To tama'Debata, kaliane anitu katihutusanna,
ingganna kahajaam to umpa'pa'de Puang Allataala, la tinanda lako
kamateam.
- ¹⁹To mase-mase ia, tä' la dipa'kalembei liu,

^c**9.15** *Kota Sion*: Indo kota Sion, tontäm kota Yerusalem. Naua illaam basa Ibrani: "Dio ba'bana änä'na Sion baine." Kalembasanna: dio olona issinna kota Yerusalem

^d**9.17** *Higayon*: Mesa kada basa Ibrani umbai' umpomakaleso maaka susi ajanganna inde Mazmur, battu haka la dipasalui penaba issinna.

anna to masussa, tä' la pa'de liu pahhannuanna.

²⁰ O DEBATA, pengke'de'ko, daa umpabäi hupatau la napentaloiKo, hotto'i ingganna kahajaam senga'.

²¹ Padadii mahea' dio oloMu DEBATA,

anna muissanni kalena naua, hupatau biasakam. Sela

10 ¹ Aka hia anna ungkambelakam DEBATA, anna tä'kam umposamele illaam kamasussaangki?

² Aka kamalangkasm penabanna to tama'Debata, nasuhum umpadondo panggähhe to masussa;

silele lu tama lunu'na pa'battana, natappai pa'lellenna.

³ To tama'Debata ussengkengam pattuju kadakena, anna to ma'podo kao, untelle anna umpa'pa'de DEBATA.

⁴ To tama'Debata tumonga pundu mengngu'be, naua illaam penabanna:

"Umba hia ngei la meita DEBATA!

Tä' tia deem Puang Allataala!"

⁵ To tama'Debata sule lako asam pattujunna;

tanalambi' suhi'na ulalamMu, anna muita dokko ingganna balinna.

⁶ Ma'kada illaam penabanna naua: "Tala tibeho susu' tatidende katonam salukatuboangku,

tala deennä' ussi'dim kamasussaam sule lako salako-lakona."

⁷ Pudu'na umpassubum pantädo, pantipu, anna kada pa'pakahea'; tula'na mebuno talembe', sola ponno kakadakeam.

⁸ Lao mangngabum lako tondä'

la umpatei to tadeem kasalaanna dio ongeam kabunianna.

Umpelässä' mata to malamma;

⁹ mangngabum dio ongeam kabunianna, susi singa mangngabum illaam alla' kuhha; muabunni to mase-mase la nasakka.

Ussakka to mase-mase,

nasakka napaalai pa'pemäläanna.

¹⁰ Umbukko'-bukko' kalena, la pahopängam; mane umpembantinganni to malamma.

¹¹ Naua illaam penabanna: "Napa'lembeimä' tia Puang Allataala anna napemboko'i;

anna tala deemmä' nanenne'i!"

¹² Pengke'de'ko DEBATA! O Puang Allataala, pahuai pa'tahungkungam to tama'Debata!

Daa ungkalembei to didahha!

¹³ Akanna umpa'pa'dei Puang Allataala to tama'Debata?

Akanna naua hia: "Tä' la mepassala Puang Allataala?"

¹⁴ Sapo' muissam siangKo ingganna kaha-kaha; muitaKo ingganna kamasussaam sola kamapi'disam, anna toka liuKo la ma'pesäkä.

Iko napengkaalai to malamma,

Iko uhhande pala' änä' bium.

¹⁵ Hengo-hengoanni limanna to tama'Debata anna to kadake gau'; passalai, anna mala nalämpäsam ube napatisam kaju ma'gau' kadake.

¹⁶ DEBATA, iam too Tomahaja sule lako salako-lakona; mentu'na kahajaam la dihamba ia lako päädä tadiada'i.

¹⁷ O DEBATA, uhhingngiammi pengkaalanna to madio; umpasule sumanga'na, umpaende' pahajanna, untande talingai pelauanna.

¹⁸ Unte'gehangko undu' lollä lako to bium anna to didahha, nasuhum tala deemmi tau si umpakahea'-hea'i.

DEBATA ongeam pentuhehungam

11:1-7

11 ¹ Lu lako to untetem to menani. Mazmur napapia Daud.

DEBATA kuongei mentuhehum, akanna deenni tau muaanä':

"Pentia'ko längäm tanete sihhapam dassi!

² Aka, petua' siai too to tama'Debata illaam ongeam mabuni, umpasam bälä'du'na,

napadekke' batunna, la natembasam to malolo penaba.

³ Maka' dipa'lullu'um ulalam, akapi la mala napogau' to malolo gau'?"

⁴ Muokko' DEBATA illaam banua masehoNa,

tadongkonganNa DEBATA, yabo suhuga;

muita längäm dokkona hupatau, tatilio-lio matanNa umpangngitai ma'hupatau.

⁵ DEBATA umpangngitai to malolo gau' sola to tama'Debata, anna unkabassi to bassa' patappaam lima.

⁶ Umpatuhum hobaja palli, belerang^e anna hibu' mellui' muä'bäi to tama'Debata,

susim too pesämbä' ullambi'i.

⁷ Aka malolo DEBATA; umpohäe kamaloloam; to malolo penaba la silindo DEBATA.

Sambajam umpelau pepamolo

12:1-9

12 ¹ Lu lako to untetem to menani. Penaniam dikatapii, katapi kahua hitinna. Mazmur napapia Daud.

² O DEBATA, pamoloikam, aka pa'dem to meada', tä'um deem to manontom illaam alla'na hupatau.

³ Tala deemmi la ma'tula' setappa' lako padanna, angga ham umpomatannim tula'

anna ma'pudu' pandem ma'lila manähä.

⁴ O DEBATA, sampunganni pudu'na to umpomatannim tula'na, sissinganni sädäna to saboä,

⁵ si ma'kada naua:

^e11.6 *Belerang*: Uba' susi mala'bu' sitonda api.

"Lengko lilaki umpopatalokam!
Moi aka la napassubum pudu'ki,
mennangka la mala umpahe'kam?"

⁶Iya ma'kadam DEBATA naua: "Kahana dipakahio-hio to
malamma,
kahana pengkaalanna to mase-mase,
lambi' temo mengke'de'ä,
umbeenni kasalamasam pa'pemulunna."

⁷KadanNa DEBATA maseho,
sihhapam peha' ma'nini,
pempitu dibahassii tama dapu' pa'lällängäm.

⁸Iko DEBATA unjkambi'kam, Iko unjagaikam dio mai to
tama'Debata sule lako salako-lakona.

⁹To tama'Debata sikalamba lu lako lu dio mai,
anna pa'pogausam kadake diangga' mapia illaam alla'-alla'na
ma'hupatau.

Sambajam pahhannuam

13:1-6

13 ¹Lu lako to untetem to menani. Mazmur napapia Daud.

²La padapi umba masäena umpa'lembeiä' DEBATA? La
umpa'lembei liumä' isanga?

La padapi umba masäena umpemboko'ia'?

³La pada hia umba masäena umpendudunnä' kamasussaam,
anna manabo inaba pusam allo?

La padapi umba masäena naondo-ondoia' balingku?

⁴O DEBATA, Puang Allataala to kupenombai,

nenne'ia' sola mata pa'kamaseMu

timba'i sambajangku!

Patibukkannä' matangku, pomasiäsannä' pennenne'ku

indana tituhhunni matangku lambi' mate,

⁵indana nauai balingku:

"Kutalo mäne'-mäne'um,"

anna sikaahhei, ke naitää' ma'duhho.

⁶Sapo' kao-kao kuhannuam pa'pakamajamMu tamalele,

kassia' anna tilalla'

aka Iko to ullangnga'ia'.

La mengkamahaä' umpuji DEBATA,

aka kusi'dingammi kamapiaam penabanNa lako kaleku!

To buta pikkiham umpa'pa'de Puang Allataala

14:1-7

14 ¹Lu lako to untetem to menani. Mazmur napapia Daud.

Ma'kada illaam penabanna to tana' tama naua:

"Tä' deem Puang Allataala."

Sangngim disoho'i pa'pogausanna to tana' tama anna mehidi'-hidi',

tala deem umpogau' kamapia.

²Mennenne' DEBATA yabo mai suhuga la umpetua' ma'hupatau, battu la deempi to keaka' naita, battu la deempi to mengkahuku' lako Puang Allataala.

³Sangngim umbanga'um tasalu sangka', anna sassa' lalam; tala deemmi hupatau la umpogau' kamapiaam, moi podo la mesa tala deenni.

⁴Tä' isanga muissam kamapiaam itim matim to kadake gau'? Muande sola kutu umma' petauang-Ku anggasanna muande bo'bo',

anna tä' deem ussa'bu' sanganna DEBATA.

⁵La mahea' anna tinggi'gi' to kadake gau', aka naundu' ia napatette Puang Allataala ingganna umma'Na to malolo gau'.

⁶Tau kadake, untelle anna muita dokko pattuju penabanna to mase-mase, sapo' to mase-mase ia, DEBATA muongannii.

⁷La sule hi too yabo mai tanete Sion to la ullappasam to Israel!

Maka' too umpapoletottommi umma'Na DEBATA, la kassi anna tilalla' pessubunna Yakub, la losso' penabanna sundede buana peänäsanna Israel.

To sihatam sipäto' tohho illaam ongeam masehoNa DEBATA

15:1-5

15 ¹Mazmur napapia Daud.

O DEBATA, menna la sipäto' tohho illaam banua masehoMu? Menna la sihatam tohho yabo Sion tanete masehoMu?

²To tä' deem sassainna lingkana anna ussoeam undu' lollä, anna sola ponno penaba untula' tappa' anna sindoho;

³to tä' deem ma'pakolo'-kolo'i tula'na, tä' umpogausam kakadakeam solana, anna tä' umpahuai tula' kadake sambanuanna;

⁴ungkahidi' to tama'Debata, sapo' umpa'kasallei to mengkahea' längäm DEBATA, to umponnoi pa'dandinna moi anna napohugi,

⁵to tä' umpakeänä' doi' napa'pehabesam, tä' naaku muala doi' passahoma'dinni la uhhonnosam to tä' deem kasalaanna.

Menna-menna ma'pogau' susi ia too, tala tilenggu' tala tibosso' sule lako salako-lakona.

Sambajam ponno kamatappasam

16:1-11

16 ¹ Mazmur^f napapia Daud.

O Puang Allataala, kambi'ä',
aka Iko kuongi mentuhehum.

² Ma'kadaä' lako DEBATA kuua: "Iko Debatangku,
tadua tatallu, anggam Iko kabuttuanna kamasannanganku!"

³ Ingganna to maseho illaam inde botto sangngim dipa'kasallei,
si naposundede buaku, napotiala inabangku.

⁴ Tuttuam la kehängäm sussa penabanna
ingganna to angga umpenombai debata lino;
tä' kao la manggalatabää' umpatitollo hahana olo'-olo la
dipehumalasam lako debata lino,
anna tä' toi deem la kuhambem kada sanganna.

⁵ O DEBATA, Iko mana'ku;
Iko ihusam katuboangku,
Iko umpangnganda'iannä' litä' katabaangku.

⁶ Sumpu mapianna indo baheam litä' to umpadokkoannä' lisu
pala'ku,
tä' deem pada saumpasundede buaku indo mana'ku.

⁷ Kupuji DEBATA to umbeennä' pepanännä' anna pepakilalaam;
illaam wattu bengi, natundannä' napakilala penabangku.

⁸ Kupadio liu oloku DEBATA,
aka Ia passappi' matoto'ku dio tandai kanangku,
nasuhum tatilenggu'ä' tatibosso'.

⁹ Lambi' tiala inabangku, sundede buaku,
anna masannam bätä puntingku.

¹⁰ Aka tä'Ko umpabäiä' tinanda lako kaliane anitu,
tä'Ko umpabäi inde to manuhu' matim la ullambi' kamateam.

¹¹ Iko umpatuhoiä' lalam la tinanda lako katuboam;
olo tingngajoMu naongi buttu katilallasam sanda silapi',
anna Iko pengkalaoanna kamasannangam sule lako salako-lakona.

Sambajam umpelau kamaloloam

17:1-15

17 ¹ Sambajanna Daud.

O DEBATA, pehingngii pelauangku, umpelau kamaloloam;
hingngianni pengkaalaangku;
patanannii talinga sambajangku,
tama'pudu' pandem tama'lila manähä.

² Pa'kadaannä' illaam pahhottosam DEBATA,
ussangkamata-mataiKo kamaloloam.

^f **16.1** Mazmur: Illaam basa Ibrani naua, Miktam. Tä' makaleso kalembasanna, umbai' susi Mazmur.

³ Maka' umpangngitaiKo unä' penabangku,
umpahessaä' anna umpengkalesoi wattu bengi,
inna tä' sia deem la ullolongam moi podo la mesam
kakadakeangku;

puham kukattu tala deennä' nakabuttui tula' kadake.

⁴ Taia kao pa'palakoam hupatau kutuhu'i,
sapo' battakada messubum illaam mai pudu'Mu,
lambi' ussehe'jä' kaleku dio mai lingkana ingganna to bassa'
patappaam lima;

⁵ lingkaku manontom untuhu'i lingkamu,
pentekkaku tala lempä kanam tala lempä kaihi.

⁶ O Puang Allataala, mengkaalaä' matim oloMu
aka si untimba'jä';
o DEBATA, tande talingaiä',
pehingngii pelauangku.

⁷ Pa'patandaanni pa'pakamajamMu tamalele, to mepilla'-pilla',
o To ullappasam ingganna to mentuhehum lako katea' bassimMu,
dio mai mentu' balinna.

⁸ Kambi'ä' umba susi unjagaiKo lise' matamMu,
buniä' nakumbäi pani'Mu

⁹ dio mai to tama'Debata to la umpempa'deannä',
dio mai pallimbutamanna balingku to la umpemäläi sungnga'ku.

¹⁰ Sangngim tasiampuam pa'häntängam bua,
silele ma'kada saboä;

¹¹ nakadonti lingkaku anna nalebo puhhi'di'ä',
napebujoä' la napembussusam dokko litä'.

¹² Sihhapam singa la pahopängam ussempa-semba balinna,
anggasanna singa kamagassinganna, mangngabum dio ongeam
kabuniam.

¹³ O DEBATA, pengke'de'Ko,
ebai balingku, ammu popa'bukkui dio oloMu.
Pakei pa'damMu ullappasannä'
dio mai pambundu'na to tama'Debata.

¹⁴ O DEBATA, huntu'jä' illaam mai alla'-alla'na
to angga umpikki' kulle di lino;
la napokadeasam di too indo to umpatokaam,
lambi' la napesanta'ipi mentu' pandadianna,
anna la nalambi'pi sule lako pessubunna.

¹⁵ Sapo' kao-kao, mesaä' to malolo nasuhum la kuita lindoMu;
wattungku bangom,
sumpu tialanna inabangku muita hupamMu.

Penaniam pa'kuhhusam sumanga'na Daud

18:1-51

18 ¹ Lu lako to untetem to menani. Mazmur napapia Daud, sabua'na
DEBATA. Napengkamahaam Daud längäm DEBATA wattunna
nalappasam dio mai pala' limanna Saul sola ingganna balinna Daud.

² Ma'kada Daud naua: O DEBATA, kupakamajako, kamatohoamMu umpasukunnä'!

³ O DEBATA, Iko buntu batungku, bettem matoto'ku, anna to ullappasannä',

Puang Allataala To kupenombai, buntu batungku, Ia pentuhehungangku,

unta' matoto'ku, tandu' kasalamasangku,⁹ lempo kuonpei mentuhehum!

⁴ Mengkaalää' längäm DEBATA to sipäto' dipuji, lambi' nallappasannä' dio mai ingganna balingku.

⁵ Nabaluntanimä' pebalum, napakao'dä-o'dä pallulunna katilakaam.

⁶ Nabe'be'imä' pepungngu'na tomate, tipattim poja la mepakattu sungnga' dio oloku.

⁷ Mengkaalää' längäm DEBATA illaam kamasussaangku, metambaä' längäm Puang Allataala to kupenombai umpelau pepamolo.

Nahingngi kamahangku längäm banua di ada'Na, anna napaalai penaba pelauangku.

⁸ Iya pahodom anna kakemba-kemba lino, pagego' anna pahundam ingganna pentokoanna tanete, napobua' aha' kasalleNa DEBATA.

⁹ Pelamboho hambu illaam mai illäNa, mellelo api illaam mai sädäNa, tiseмбу' hobaja illaam mai pudu'Na.

¹⁰ Umpatibukka langi' naola yabo mai, tihembom gabum malotä dio pehhondoanNa.

¹¹ Mentia' ussäkei kerub;^h mentia' sumaniu' umpa'tendam hibu'.

¹² Ussapu' kaleNa malillim naonpei mentuhehum, naonpei mentulindum, umputu' kaleNa gabum makambam ma'ku'dum.

¹³ Pangkähhä dio oloNa umpassii lao gabum, anna umpasule uham batu sola hobaja.

¹⁴ Mane magaluntu'i DEBATA yabo langi'; To Handam Matande umpa'pahingngiam kamahanNa.

¹⁵ Umpa'tembasam batu bälä'du'Na, nasuhum tiseham ke'de' balinNa; umpasilalle kila', lambi' sikalumpa' lao to umbalii.

¹⁶ Tibungkalle posi' mapättäna le'bo', anna tandaam apa' mahihinna litä', tappana untibuheseiKo balimMu DEBATA, tappana messubum penaba kakuasaamMu illaam mai illäMu.

¹⁷ Umpengkandoam limanNa DEBATA yabo mai ongeam malangka';

⁹**18.3** *Tandu' kalappasangku*: Inde tula' mesa pehapangam diona kuasa kamatohoanna Puang Allataala ulappasam hupatau.

^h**18.11** *Kerub*: Sahhupa pesuana Puang Allataala buttu yabo mai suhuga. Indo kerub ma'pani'. Batai Yeh. 1:10, 10:1-17.

naanda'ia' anna nahuntu'ä' dio mai uwai la mepusa'i.

¹⁸ Nalappasannä' dio mai balingku to bahani matoho,
anna dio mai ingganna to ungrabassiä',
aka tä' deem lalanna la kutaloi.

¹⁹ Sikanaheba' lalangku wattungku nahua kamasussaam,
sapo' DEBATA sussaheangu.

²⁰ Natässu'ia' nababa lako pädä kalua' ongeam malona',
anna nalangnga'ia' aka napohäeä'.

²¹ Naulalannä' DEBATA situhu' kamaloloangu;
natamba'ä' aka tadeennä ma'gau' kadake.

²² Aka kutuhu'i ulalanNa DEBATA

anna tama'gau' kadakeä' umpemboko'i Puang Allataala to
kupenombai.

²³ Ingganna ätohanNa takupalappa'i mata takupasalai pikkiham,
anna ingganna pahentaNa kuoli' mamma' kusalungku metindo.

²⁴ Maseho pindannä' maunna' pebajoam dio oloNa,
anna kujagai liu kaleku anna mala tää' umpogau' kakadakeam.

²⁵ Nasuhum nabala'iannä' DEBATA situhu' kamaloloangu,
aka naissam naua, tä' deem kasalaangu.

²⁶ Lu lako to manontom, umpa'patandaangKo kamanontongamMu,
lu lako to tadeem sassainna umpa'patandaangKo katepuamMu.

²⁷ Lu lako to maseho umpa'patandaangKo kamasehoamMu,
sapo' lu lako to manekko' umpa'patandaangKo kakeakasamMu.

²⁸ UllappasangKo to dipakamase-mase,
sapo' uhhonosangKo to mangngita-ita dokko.

²⁹ O DEBATA, Iko umballoiä';

o Puang Allataala to kupenombai, Iko ummasiä'i kamalillingangu.

³⁰ Iko umbeennä' kamatohoam la umpentaloi mentu' balingku;
anna pepamolona Puang Allataala to kupenombai lambi' kukahaba
bettena.

³¹ Tepu ulalanNa Puang Allataala;
tä' deem sassainna pa'dandinNa DEBATA.

DEBATA unta' matoto'na

ingganna to mentuhehum lako kaleNa.

³² Aka mennangka Puang Allataala senga' sulibanna DEBATA,
anna mennangka buntu batu sulibanna Puang Allataala to
tapenombai?

³³ Puang Allataala ussamba'ä' kamatohoam,
anna Ia umpomalolo lalangku.

³⁴ Ia umpomatitta bitti'ku sihhapam bitti' jonga,
anna Ia umpomatogonnä' ke'de' yabo tanete malangka'.

³⁵ Napatuduä' laoanna pa'bundusam,
nasuhum matohoä' ungedoam bälä'du' gällä.

³⁶ O DEBATA, Iko umbeennä' unta'Mu umpa'timpasannä',
katea' bassimMu ussamba'ä';

kamapiaam penabamMu napolalam makkatalo-taloä'.

³⁷ Umpomalobännä' lalangku,
anna tapuppu' lente'ä' tamangingngi' taha-taha.

³⁸ Kupangngappi' balingku sampe kusakka simesa,

anna tä' kuaku ma'pasule ke tä'i kupempa'deam asam.

³⁹ Kupentettesam simesa lambi' tä' nabela ma'geu',
silele tiampa' dio oloku.

⁴⁰ Iko ussamba'ä' kamatohoam illaam pa'bundusam,
Iko umpopa'balinguntu' dio oloku to umpobaliä'.

⁴¹ Iko umpasikalumpa' lao balingku napelleiä';
ingganna to unγκabassiä' kupempa'deam.

⁴² Sikatamba umpelau pepamolo, sapo' tä' deem umpesäkäii,
silele mengkaala längäm DEBATA, sapo' tä' deem natimba'i.

⁴³ Kupadahi kapu' susi sobä' natantam hibu',
anna kupa'tibeanni lako lalam susi hossä' la dipa'kuttä'.

⁴⁴ Ullangnga'ia' dio mai kamesaanna hupatau to pabali-bali,
anna muäkä'ä' unγκuasai buda kahajaam;
to tadiita hambu apinna kuposabua'.

⁴⁵ Napelelena pa'palakoangku, tappa mengkahea' lako kaleku;
to sulibam botto ma'bukku dio oloku.

⁴⁶ Silele maputtum lindona;
sangngim lumalla' messubum illaam mai bettena.

⁴⁷ Mannassa tubo DEBATA! Dipuji buntu batungku!
Dipomatande Puang Allataala to ullappasannä'!

⁴⁸ Puang Allataala, iam too to umpabala'i pa'pogausanna balingku;
buda kahajaam napopa'luttu' dio oloku,

⁴⁹ nalappasannä' dio mai pala' limanna balingku.

O DEBATA, Iko umpopataloä' mueba balingku,
ullangnga'ia' dio mai pala' limanna to bassa' patappaam lima.

⁵⁰ Nasuhum la kupakende' pa'kuhhusam sumanga' dio oloMu
illaam alla'-alla'na buda kahajaam,
anna kupengkamahaam pampujiam lu matim.

⁵¹ Ia umbeem kapataloam kasalle lako tomahaja pantuhoNa,
anna umpa'patandaam pa'pakamajanNa tamalele lako to nalanti',
Daud-um too sola ingganna pessubunna
sule lako salako-lakona.

**Kamatandeanna DEBATA tandaam
illaam pa'padadinna anna illaam PaondonNa**

19:1-15

19 ¹ Lu lako to untetem to menani. Mazmur napapia Daud.

² Langi' umpa'pakahebaam kamatandeanNa Puang Allataala,
anna lawwa umpa'paissangam pa'padadinNa.

³ Allo sibala' allo umpa'paissangam kaheba kamatandeanNa,
anna bengi sibala' bengi umpa'patandaam kakuasaanNa.

⁴ Tala deem ma'kada anna tala deem ma'tula',
tala deem dihingngi kamahanna.

⁵ Sapo' kahebana, naissam asam senambo lino,
anna passa'biinna sule lako lili'na lino.

DEBATA umpapiaam ongeam mata allo yabo langi',

⁶ wattu mebengngi' buttu

sihhapam änä' muane to la kabem messubum illaam mai
 tambinna,
 susi mesa to matitta tilalla' la umpahandu' pa'laoanna.
⁷ Mengkalao illaam bihinna langi',
 mellao tahhu' sule sau' bihinna langi';
 tä' deem nasala malussunna pangkähhäna.

⁸ PaondonNa DEBATA tepu,
 umpatiala inaba;
 ätohanNa DEBATA sipäto' dikatappa'i,
 umpadadi keaka' to tabuda kapaissanganna.

⁹ PahentaNa DEBATA tappa',
 umpomasannam penaba;
 kadanNa DEBATA malolo,
 umpatibukka pikkiham.

¹⁰ Mengkahea' lako DEBATA abana mapia,
 la da'da' liu sule lako salako-lakona;
 ingganna ätohanNa DEBATA tappa',
 anna sangngim malolo.

¹¹ ÄtohanNa DEBATA keangga' ia anna la bulabam,
 keangga' puha ia anna la bulabam täsä';
 matannim ia anna la duho,
 matannim puha ia anna la duho tadito'bo';

¹² Ia asanna ia too umpakilala inde sabua'Mu,
 anna tokam saho kasalle la napadipala' ingganna to umpalakoi.

¹³ Mennangka tau la muissam kabulinganna?
 O DEBATA, lappasannä' dio mai kasalaam balam takuissanna.

¹⁴ Pasikambelai inde sabua'Mu dosa la diägä'inna dipogau',
 daa umpabäi la nakuasaiä'.
 Lambi' la tä' deem sassaingku,
 anna lappa'ä' dio mai pa'pogausam handam kadake.

¹⁵ O DEBATA, buntu batungku anna to ullappasannä',
 la umpohäe hi too pessubungam pudu'ku anna issi penabangku!

Sambajam umpelauam kapataloam tomahaja

20:1-10

20

¹ Lu lako to untetem to menani. Mazmur napapia Daud.

² La natimba'i hako too DEBATA illaam wattu kamasippisammu!
 La nahindim batu hako too sanganna Puang Allataala to
 napenombai Yakub!

³ La napasuleam dako too pepamolo yabo mai ongeam masehoNa,
 anna pepakatoto' yabo mai tanete Sion.

⁴ La nakilalai asam di too indo bua pemala'mu,
 anna la napasannam penabanNa ingganna tunuammu.
Sela

⁵ La naponnoiam dako too ingganna pa'pemulummu,
 anna napasule lako lolona napatianta' di kati-katinna ingganna
 pattujummu.

⁶La sikaahhekam tilalla' untilalla'i kapataloammu,
anna untandeamkam bandeha kapataloam umpuji sanganna
Puang Allataala to tapenombai.
La nahingngiam di too DEBATA ingganna pelauammu.

⁷Tentomai kuissammi kuua DEBATA umbeem kapataloam
tomahaja pallanti'Na.
Nahingngiam DEBATA yabo mai suhuga ongeam masehoNa,
katea' bassinNa DEBATA nasuhum ullolongam kapataloam kasalle.

⁸Deem tau uhhannuam bendi pa'bundusanna,
deem duka' uhhannuam dahanna.
Sapo' kitaa' kita, kakuasaanNa DEBATA, Puang Allataala to
tapenombai tahannuam.

⁹La silele ia tappa bussu' anna tissämbä',
sapo' kitaa' kita, la bangongkia' anna ke'de' matoto'.

¹⁰O DEBATA, lappasanni tomahaja!
Hingngianni ke mengkaalakam matim!

Mazmur untilalla'i kapataloanna tomahaja

21:1-14

21 ¹Lu lako to untetem to menani. Mazmur napapia Daud.

²O DEBATA, sundede buana tomahaja aka umbeem kamatohoam;
tiala inabanna aka indo kapataloam to umbeem!

³Umpasule lakoammi pa'pemulunna,
anna tä' untumpu pala' pelauam pudu'na.
Sela

⁴Untingngajo kasuleanna sola mana' sanda silapi', anna
ma'songko' tomahaja bulabam dipapia.

⁵Napelau tala dondom bulu salamba'na, iya umbeem
kamahendengam sule lako salako-lakona.

⁶Napa'kasallei hupatau aka umbeem kapataloam,
Iko umpadadii matande anna dipa'kasallei.

⁷Takattu tintim tamondo' sahuham pa'tamba'Mu lako kalena;
mengkahuku' dio oloMu nasuhum umpaponnoi katilallasam.

⁸Aka mahannu tomahaja längäm DEBATA,
anna pa'pakamajanNa tamalele To Handam Matande, lambi'
tatige'ge' tatigesse ma'pahenta.

⁹La unta'galangKo mentu'na balimMu, DEBATA,
anna la ussakka ingganna to untkabassiKo.

¹⁰La suleKo sihhapam api mellelo
la muä'bäii.

La napempa'deam asam aha' kasalleNa DEBATA,
anna api la muä'bäi simesai.

¹¹Ingganna pessubunna tala deemmi umpopehä'dä',
mentu'na pandadianna tala deemmi umpopeata.

¹²Maka' la napeängangko tuntungam su'be',
nadakasam pa'posanga-sanga, talapalle' talapadissi.

¹³Uhhuntu'ko bälä'du'mu,

ammu penotoi,
 nasuhum silele soho' boko' anna sikalumpa' lao.
¹⁴DipomatandeKo DEBATA, aka tä' deem pada sakasalle
 kakuasaammu,
 la menanikam anna kipuji kamatohoamMu.

Sambajam illaam kamasussaam sola pampujiam

22:1-32

22 ¹Lu lako to untetem to menani. Situhu' ajanganna penaniam:
 Jonga wattu mebunggi'. Mazmur napapia Daud.

²O Puang Allataala, Puang Allataala to kupenombai,
 akanna untampeannä'?

Mengkaalää' matim, sapo' tontäko mambela
 anna tä' umpamoloïä'.

³O Puang Allataala to kupenombai, mengkaalää' matim wattu
 iallo,

sapo' tä'ko deem mentimba'.

Ma'sambajannä' matim wattu bengi,
 sapo' tä' siam mala masannam penabangku.

⁴Sapo' moi anna susi, tontä liuKo Tomahaja Handam Maseho,
 to napuji anna napa'kasallei to Israel.

⁵Iko nahannuangko nene to kipunene;
 nahannuangko anna ullangnga'i.

⁶Silele mengkaala matim, anna ullangnga'i;
 sikamahannu matim, anna tä' kasihisam.

⁷Sapo' kao-kao indee, ula'-ula' pakuä', taia hupatau,
 napa'pa'dei anna nakabassi tau buda.

⁸Ingganna to muitää', natelleä',
 sikamengngu'be, anna muilim-ilim.

⁹Sikama'kada naua: "DEBATA nahannuam,
 pabäi toda' Ia ham ullangnga'i;

pabäi Ia ham ullappasanni!

Kusanga napohäe paha' DEBATA?"

¹⁰Iko umpatibussannä' illaam mai tambu',
 Iko umpomahannuä' matim sumusu dio abinganna indoku.

¹¹Mengkalao dadingku, inna dibehomä' dokko lisu pala'Mu,
 illaampä' tambu' anna Ikom Puang Allataala to muampuannä'.

¹²Daa ungkambelää', aka mahuku'um kamasussaam,
 anna tä' deem la umpamoloïä'.

¹³Naleboä' balingku sihhapam sapim laki buda,
 napali' tintinnä' susi banteng ma'palasa mahosom buttu dio mai
 Basan;

¹⁴Silele mengängngä natammuiä',
 sihhapam singa meala, anna ma'ehhem.

¹⁵Pa'dem kamatohoangku sihhapam uwai titollo,
 lussem asammi bukungku anggasanna silalla lesoanna,

mahehe pallam penabangku;

¹⁶ mabangi bahokoku susi bibä dihehä,
tippodo'um lilaku tä' mala tika'bi'.

O DEBATA, umpopetindoä' dio sobä'
ongeanna to mate.

¹⁷ Natalimum tamaä' kamesaanna to kadake gau';
sihhapam asu buda ulleboä',
nasibuno-bunoi bitti'ku anna limangku.

¹⁸ Sikatekä' bukungku mala kuhekem,
nasipetua'-tua'ia', napengkitaiä' balingku.

¹⁹ Nataba-taba pohebaku,
anna naundi jubahku.

²⁰ Sapo' Iko, o DEBATA, daa ungkambelaä',
Iko kamatohoangku,
simpanii mai umpamoloia'.

²¹ Lappasannä' dio mai pala' limanna to untetännä' pa'dam,
langnga'ia' dio mai passakkana asu buda.

²² Tässu'ia' illaam mai sädäna singa,
puhamä' ullangnga'i dio mai tandu' banteng.

²³ La kupa'paissangam sangamMu lako ingganna solasubungku;
la kupujiKo illaam alla'-alla'na umma'Mu.

²⁴ O inggammua' to mengkahea' längäm DEBATA, pujii sangana!
O inggammua' pessubunna Yakub, pomatandekoa' DEBATA!
O inggammua' peampoanna Israel, pengkahea'ikoa' DEBATA!

²⁵ Aka DEBATA, tä' umpa'bahinni'i kamasussaanna to didahha,
anna tä' napeela-elaam.
Tä' umpemboko'i tau ia too,
sapo' nahingngiam ke mengkaalai.

²⁶ KupujiKo illaam alla'-alla'na pa'hempungam kasallena umma'Mu,
aka indo puha umpogau'.

La ulleppa'ia' samajangu matim dio olona ingganna to
umpengkahea'iko.

²⁷ To masussa la mangngande sampe dea';
To umpameä DEBATA, la umpakende' pampujiam.
La mahendem dakoä' too sule lako salako-lakona!

²⁸ Ingganna hupatau sule lako lilli'na lino la mengkilala,
anna ma'pasulei lako DEBATA,
mentu'na kahajaam la menomba dio olona.

²⁹ Aka DEBATA inna Tomahaja,
umpahenta ingganna kahajaam.

³⁰ Ingganna to makaka di lino la menomba dio olona DEBATA,
ingganna to la tinanda di assala'na la menomba längäm DEBATA,
inna tala mala ullombunni sungnga'na.

³¹ Ingganna lapi' mane la kende' la manomba lako DEBATA,

anna la umpentulasam diona DEBATA lako ingganna to mane la dadi.

³² Lu lako ingganna hupatau to la kende' allo di dako'na la ditulasam diua,
DEBATA puha ullappasam umma'Na.

DEBATA to ma'kambi' masokangku

23:1-6

23 ¹ Mazmur napapia Daud.

DEBATA-m too To unγκambi'ä',
tä' deem la kakuhängannä'.

² Napopellubeä' dio humpu' mahombo;
napatinandä' lako uwai mahändä.

³ Napatialannä' inabangku,
napatetteä' lako lalam malolo,
anna mala sanganNa tontä dipa'kasallei.

⁴ Moi la muolaä' lembä mandalam,
tä' deem la unγκahea'ä' kasägängam,
aka Iko umpasolaiä';
boseMu sola tekkemMu,
iam too umpatiala inabangku.

⁵ Umpatokaannä' kinande dio olona balingku.
Untammüä' untolloi minnä'-minnä' bubanau' ulungku;
ussohäiä' uwai ihu' takupuha-puha.

⁶ KamapiaamMu anna pa'pakamajamMu tamalele umpogau' tama
kaleku
upu' salukatuboangku,
anna la tontä liuä' tohho illaam banua DEBATA,
sule lako salako-lakona.

DEBATA tomahaja handam matande

24:1-10

24 ¹ Mazmur napapia Daud.

DEBATA umpuängam lino sitonda issinna,
lino sola ingganna to tohho illaanna.

² Umpaokko' lino yabona le'bo',
anna napatadongkom yabona ingganna salu.

³ Mennangka la sipäto' längäm taneteNa DEBATA?

Mennangka la sihatam ke'de' illaam ongeam masehoNa?

⁴ To tä' deem sassainna pa'palakoanna anna mahändä penabanna,
tä' umpenombai debata lino anna tä' ma'pinda-pinda bäbä.

⁵ Iam too la untahima pa'tamba' DEBATA,
anna napomalolo Puang Allataala to ullapasanni.

⁶ La susim too hupatau to umpameä Puang Allataala,
to umpameä hupanNa Puang Allataala, to napenombai Yakub. Sela

⁷ Äkä'ko kalemu, o tondom ba'ba malobä,

tiäkä'ko längäm, o tondonna ba'ba malobä mahhatu' taum dadinna,

anna mala naola mentama Tomahaja Handam Matande!

⁸Menna itim diuam Tomahaja Handam Matande?

DEBATA to handam matoho anna makkatalo-talo;

to makkatalo-talo illaam pa'bundusam.

⁹Äkä'ko kalemu, o tondom ba'ba malobä,

tiäkä'ko längäm o tondonna ba'ba malobä mahhatu' taum dadinna,

anna mala naola mentama Tomahaja Handam Matande!

¹⁰Menna itim diuam Tomahaja Handam Matande?

DEBATA To Handam Kuasa passappi' matoto'ta;

Iam too Tomahaja Handam Matande! Sela

Sambajam umpelau pepatette anna pa'kambi'

25:1-22

25 ¹Mazmur napapia Daud.

O DEBATA, lu matim oloMu kuäkä' penabangku.

²O Puang Allataala to kupenombai, Iko kukatappa'!

Daa umpabäi balingku napakasihi'ä',

daa umpabäi napetaba-tabaiä'.

³Ingganna to mahannu matim tä' ia la dipakasihi',

sapo' la nahuham ia longko' to umbombä'iko tä' deem lalanna.

⁴Paissanniä' ulalamMu DEBATA,

patuduä' untuhu'i ulalamMu.

⁵Patetteä' muundu' kamaloloamMu anna umpatuduä',

aka Ikom too Puang Allataala to ullappasannä',

to kuhannuam allo anna bengi.

⁶Inghanni mentu' pa'kamaseMu anna pa'pakamajamMu tamalele DEBATA,

to inna deemmi pempom dio mai.

⁷O DEBATA, daa umpatumäiä' mentu'na dosaku anna gau'ku sala

basabaku lenda di mangnguhangu,

sapo' kilalaiä' situhu' pa'pakamajamMu tamalele,

umba susi kamapiaam penabamMu.

⁸Inde DEBATA, mapia penaba anna malolo,

iam too anna umpatudum ulalam lako to madosa.

⁹DEBATA umpatette to mahempo penaba lako kamapiaam,

anna napatudu ulalanNa.

¹⁰Ingganna pa'palakoanNa DEBATA ponno pa'kamase tatibeho

susu' tatidende katonam anna kamanontongam,

lako hupatau to muoli' mamma' ussalungku metindo pa'dandianNa

sola pahentaNa DEBATA.

¹¹O DEBATA, ampunniannä' kasalaangu anna mala sangamMu

dipa'kasallei, aka tä' deem pada sabuda gau'ku sala basabaku

lenda dio olomu.

¹²Menna-menna mengkahea' längäm DEBATA,

napatudu ulalam la pahallunna naundu'.

¹³Tau ia too, la tontä liu masannam katuboanna,

anna sule lako pessubunna la mahapa' untadongkonni botto
litä'na.

¹⁴ DEBATA sangkalamma' lako to mengkahea' dio oloNa,
anna napaissanni pa'dandianNa.

¹⁵ Kupomanontom pennenne'ku längäm DEBATA,
aka nalappasannä' dio mai tondom katilakaam.

¹⁶ Tingngajoiä' ammu kamaseiä',
aka mabium-biunnä' anna didahha.

¹⁷ Tuttuam kehängäm kamasussaam penabangku,
lappasannä' dio mai kamasippisangku.

¹⁸ Petua'i pi'di'ku anna kamasussaangku,
anna ampunniannä' ingganna dosaku.

¹⁹ Petua'i, tä' deem pada sabuda to umpobaliä';
anna liba' nakabassingku.

²⁰ Kambisannä' sungnga'ku anna ullappasannä',
indana kasihisannä',
aka Iko kupentuhehunni.

²¹ La naundu'dä' too kamahändängam penaba anna kamaloloam,
aka mahannuä' matim.

²² O Puang Allataala, lappasanni umma'Mu to Israel
dio mai ingganna kamasippisanna!

Sambajam umpelau kamaloloam

26:1-12

26 ¹ Mazmur napapia Daud.

O DEBATA, undusannä' lollä,
aka tä' deem sassainna pa'palakoangku.

Mahannuä' längäm DEBATA,
anna tä' deem moi podo sai'di'um kabata-bataangku.

² O DEBATA, pangngitaiä' anna umpesi'dinniä',
pahessai lalam penabangku anna pikkihangu.

³ Aka kusi'dim liu pa'pakamajamMu tamalele,
anna tontä liuä' tubo situhu' kamaloloamMu.

⁴ Tää' pada ke'de' pada isu' to manipu,
anna tää' pada lao to ma'dua tambu' to ma'tallu sumusu.

⁵ Kukabassi kamesaanna to kadake gau',
anna tää' pada ke'de' pada isu' to tama'Debata.

⁶ O DEBATA, membese mahändää' dio oloMu tandana tä' deem
kasalaangku,

anna mellaoä' ullilinni ongeam pehumalasam matim oloMu,

⁷ kupasindum kupopemamba guntu' penaniam pa'kuhusam
sumanga',
anna kupa'paissangam pa'pogausam memängä-mängäMu.

⁸ O DEBATA, tä' deem pada sakupohäe banuamMu,
okkosam kamatandeamMu.

⁹ Daa umpakattu sungnga'ä' sola to madosa;
daa umpakattu kollonnä' sola to angga maelo' papateam.

¹⁰ Polima-limaanna umpogau' kakadakeam,
anna angga nakähä mangngala saho lako padanna.

¹¹ Sapo' kao-kao tä' deem sassainna pa'palakoanguku;
lappasannä' anna kamaseiä'.

¹² Ke'de'ä' dio ongeam mahampa';
la umpujiä' DEBATA illaam kakalebuanna umma' petauanNa.

Puang Allataala bettem matoto'

27:1-14

27 ¹ Mazmur napapia Daud.

DEBATA kamasiäsangu anna to ullangnga'ia',
mennapi la kukahea'?

DEBATA bettem matoto'ku kuongi mentuhehum,
mennapi la mala umpakahea'ä'?

² Wattunna nabunduä' to kadake gau' maelo' naamma' kalebuä',
ingganna indo to umpobaliä',

ia leko' di metalumbum tappa lumbä.

³ Moi la nalebo puhhi'di'ä' sohodadu,
tä' deem la mahea' penabanguku.

Moi kende' bundu' umbaliä',
la tontä liuä' mahannu.

⁴ Anggam sahhupa kupelau längäm DEBATA,
iam too inde kuinaba-naba:

toho illaam banua DEBATA upu' katuboanguku,
la ungkannassai kamapiaanNa DEBATA

anna umpameä pa'elo'Na illaam banuanNa.

⁵ Nakambi'ä' DEBATA illaam ongeanNa wattungku illaam
kamasippisam;

najagaiä' illaam ongeam masehoNa,
anna nababaä' längäm tanete malangka'.

⁶ Tentomai untandeammä' kapataloam ullumbäi balingku to ullilim
tikuä';

lambi' umbaku-bakuannä' a'da'

umbaba bua pemala' pa'kuhhusam sumanga' tama ongeam
masehoNa DEBATA;

la menaniä' anna umponi poni-poniam umpuji DEBATA.

⁷ O DEBATA, hingngianni pengkaalangku matim,
häntängannä' bua, anna tahimai pelauanguku!

⁸ Kuhingngi ma'kadaKo illaam penabangu muua: "Peäi lalanna
anna muitai hupangKu."

Abana inna kupameä hupamMu DEBATA;

⁹ daa umpemboko'ia'.

Daa ungkeaha' nasuhum untumpu pala' inde sabua'Mu,
o DEBATA to mepamoloingku.

Daa untibeä' anna untampeam,
o Puang Allataala to ullangnga'ia'.

¹⁰ Moi la napelleiä' ambeku sola indoku,

deem siam DEBATA la uhhiba pakkannä' nahande balida.

¹¹ Paitaiä' ulalamMu DEBATA,
patetteä' lako lalam malolo,
aka napasippi'ä' balingku.

¹² Daa umbehoä' lako pattuju penabanna balingku,
to si mendadi sa'bi tatappa' anna buhassuam.

¹³ Kukatappa'i kuua la kuita kamapiaam penabanNa DEBATA
wattungku tubo illaam inde lino.

¹⁴ Mahannuko längäm DEBATA,
pomatohoi ammu pakasallei penabammu;
mahannuko längäm DEBATA!

Sambajam pengkaalaam

28:1-9

28 ¹ Mazmur napapia Daud.

O DEBATA, Iko buntu batungku,
kuongei mengkaala,
daa umpa'talinga lenda'ia'.
Maka' tä' uhhingngiannä',
la susiä' to dio apa' mahihinna litä'.

² Hingngianni peluangku ke mengkaalaä' umpelau pepamolo,
anna muäkä'ä' limangku ma'sambajam mengngolo lako ongeam
masehoMu.

³ Daa untibeä' sola-sola to tama'Debata,
sola to umpogau' kakadakeam.

Si mapia dio pudu'na,
sapo' kadake illaam penabanna.

⁴ Pabala'i situhu' pa'palakoanna,
situsu' pa'pogausam kadakena.

Tahungkunni situhu' kakadakeam puha napogau';
pabala'i la sihatanna pa'pogausanna.

⁵ Silele umpa'bahinni'i pengkähäNa DEBATA,
anna ingganna pa'padadinNa.

Iam too anna la napatianza' simesam,
anna tä'um deem la napatibangom sule.

⁶ Dipuji DEBATA,
aka nahingngiammi peluangku.

⁷ DEBATA kamatohoanguku, anna unta' matoto'ku;
Ia kuhannuam sola ponno penaba.

Napamoloiä' nasuhum tiala inabanguku,
umpenaniannä' pa'kuhusam sumanga' längäm oloNa.

⁸ DEBATA kamatohoanna umma'Na,
bettem to umpa'tippasam umpa'pehasiam tomahaja pallanti'Na.

⁹ O DEBATA, pesäkäi umma'Mu,
tamba'i hupatau pangkaha'Mu.

Kambi'i anna hiba pakkanni uhhande balida sule lako
salako-lakona.

Kamahanna DEBATA ponno kuasa**29:1-11**

29¹ Mazmur napapia Daud.

Pujiko DEBATA mentu'nako issinna suhuga;
pujii kamatandeanNa anna kamatohoanNa.

² Akui kamatandenna sanganNa DEBATA,
penombako umpake poheba pa'hettengam.

³ KamahanNa DEBATA memamba yabona le'bo',
Puang Allataala to matande magaluntu',
DEBATA memamba yabona le'bo' kalua'.

⁴ KamahanNa DEBATA, ponno kamatohoam,
kamahanNa DEBATA, ponno kamatandeam.

⁵ KamahanNa DEBATA ungkopo-kopo kaju aras',
uhhuppu'-huppu' kaju aras Libanon.

⁶ Umpakahidä-hidä tanete Libanon sihhapam änä' sapim,
umpakatibe-tibe buntu Siryon sihhapam änä' banteng.

⁷ Kamahanna DEBATA
umpatikiä kila'.

⁸ KamahanNa DEBATA unggego' päda kukku',
umpopahundam päda kukku' Kades.

⁹ KamahanNa DEBATA umpatipa'läppu' änä' jonga,
anna ussäppe'-säppe' kaju pangngala'.

Ingganna umma'Na metamba illaam banua DEBATA naua:
"Dipuji dipa'kasallei DEBATA!"

¹⁰ DEBATA ma'kuasa yabona uwai bussu,
DEBATA ma'pahenta sule lako salako-lakona.

¹¹ DEBATA hi too la umbeem kamatohoam umma'Na,
anna la namana' kamasannangam.

Sambajam pa'kuhhusam sumanga'**30:1-13**

30¹ Mazmur napapia Daud. Penaniam untilalla'i Banua DEBATA
tappana dadi.

² O DEBATA, la kupujiko kupa'kasallei,
aka Iko muangkahannä',
anna tä' umpabäi balingku natelleä' napa'pissi'.

³ O DEBATA Puang Allataala to kupenombai, mengkaalaä' matim
umpelau pepamolo,
anna umpabono'mä'.

⁴ Iko ullangnga'ia' dio mai ba'ba talumbä,
anna untutusannä' ba'ba pamombä.

⁵ O inggannakoa' umma'Na to manontom meada',
penaniko umpuji DEBATA,
anna pa'kuhhu' sumanga'ko längäm To Handam Maseho.

ⁱ29.5 *Kaju aras*: Sakhupa kaju kasalle, matogom anna makahha'. Kaju masuli' angga'na.

⁶Aka anggama säpäi' keaha' DEBATA,
sapa' kamapiaam penabanna upu' katuboanta;
puli bengi angga sahho,
tibukka' baja napessulle petaba.

⁷Wattungku masannam, ma'kadaä' kuua:
"Tala tige'ge'ä' tala tigesse!"

⁸O DEBATA, Iko umpayaboä' tanete tatige'ge' tatigesse,
aka mapia penabaKo tama kaleku.
Sapa' tappana umpemboko'ia',
iya tinggi'gi'ä' pole' mahea'.

⁹O DEBATA, Iko kuongeti mengkaala,
anna lu matim Debata mengkahumaseä' kuua:

¹⁰"Aka la gunana dio oloMu ke mateä'? Tä' deem!
Anna aka la kauntungamMu ke dokkoä' pamombä? Tä' deem!
La mala haka to mate umpujiKo,
anna la mala paka to dahi litä'um umpa'pakahebaam
kamanontongamMu? Tä'um mala!"

¹¹Pehingngii DEBATA anna ungkamaseiä'.
O DEBATA, pamoloiä'!"

¹²Uhu'ku umpopengkubalim mendadi sajo katilallasam,
ullendu'i pote bolongku, umpasullei sende penaba.

¹³Nasuhum tala tikambu pudu'ku tala messingngammu' limangku,
mengkalao illaam penabangku lemba' dio pudu'ku kupujiKo o
DEBATA, Puang Allataala to kupenombai,
anna la ma'kuhhu' sumanga'ä' matim sule lako salako-lakona!

Masannam illaam pala' limanNa DEBATA

31:1-25

31 ¹Lu lako to untetem to menani. Mazmur napapia Daud.

²O DEBATA, Iko kupentuhehuni,
daa umpabäiä' dipakasihi'.
Lappasannä' aka to muundu'Ko lollä.

³Patanannii talinga inde sabua'Mu, simpannii ullangnga'ia'!
Kupemala la mendadiKo buntu batungku
to kuongeti mentuhehum,
bettem matoto'ku,
la umpa'tippasannä' umpa'pehasiam.

⁴Aka inna Iko buntu batungku
anna bettem matoto'ku!

Undu'ä' anna umpatette anna mala sangamMu dipa'kasallei.

⁵Lappasannä' dio mai poja napattiannä' balingku,
aka Iko pentuhehunganku.

⁶Kubeho penabangku dokko lisu pala'Mu;
o DEBATA,
Puang Allataala to manontom,
Iko ullappasannä'.

⁷ Kukabassi to umpenombai debata lino takeguna;
kao-kao matappa'ä' längäm DEBATA.

⁸ La kassiä' anna tilalla'

aka tamalele pa'pakamajamMu.

Aka muitaKo kamapi'disangku,

anna ussangmata-matai kamahusam penabangku.

⁹ Tä'Ko umbehoä' dokko lisu pala'na balingku,

sapo' umpopehondoä' dio pädä kalua' ongeam malona'.

¹⁰ O DEBATA, kamaseiä',

aka illaannä' kamasippisam;

bongom matangku aka masaki penabaä',

mapi'di' penabangku, malamma bätä puntingku.

¹¹ Angga salängäm allo katuboangku napobua' kamasussaam,

angga tikalibajo katuboangku napobua' kamapi'disam.

Kuhämmi kamatohoangku napobua' gau' kadakeku,

anna lussemmi bukungku.

¹² Napetaba-tabai asammä' balingku,

senga'pa ia mentu'na sambanuanku.

Tikkedu' asam solaku ke naitää',

tappa sikalumpa' lao ke sitammukam lako lalam.

¹³ To tadihekemmä' kao susi to mate,

anna tadipaalai suhi' susi huppu' pindam.

¹⁴ Umba-umba naongi kende' kamaheasam;

kuhingngi balingku sikabisi' napalilingannä' tangnga'.

Napeängannä' tuntungam su'be' nadakasam pa'posanga-sanga,

maelo' la napakattu sungnga'ä'.

¹⁵ Sapo' mahannuä' matim, DEBATA,

ma'kadaä' kuua: "Iko Puang Allataala to kupenombai."

¹⁶ Upu' tuboku illaannä' lisu pala'mu;

lappasannä' dio mai pala' limanna mentu'na balingku,

anna ingganna to umpadondo panggäheä'.

¹⁷ Nenne'i inde sabua'Mu DEBATA, sola mata pa'kamaseMu;

pesäkäiä' aka pa'pakamajamMu tamalele.

¹⁸ O DEBATA, daa umpabäiä' dipakasihi',

aka mengkaalä' matim;

pabäi ia to tama'Debata dipakasihi',

anna bandam-bandam dio apa' mahihinna litä' tatiku'mi' pudu'na.

¹⁹ Sissinni sädäna to kaägä'-ägä',

si untio'-tio' to malolo gau'

tanda kamalangkasam penabanna.

²⁰ Sundum ganna' hongko' anna upa'

umpatokaam lako to mengkahea' dio oloMu!

Lanto anna kabangam nasa'bi'i ma'hupatau kampaam

penabamMu,

lako to mentuhehum matim.

²¹ Umpasamboi pangkähhäna hupamMu

dio mai pattujunna to tama'Debata;

muunta'i dio mai mentu' pa'pakolo'-kolo'inna balinna.

²² Dipuji DEBATA,

aka tä' deem pada samemängä-mängä pa'pakamajanNa tamalele,
wattunna nalilim tikuä' balingku illaam mesa kota.

²³ Kusanga untampeammä' DEBATA

indo anna mahassannä' hahu'.

Sapo' nahingngiammi pelauangku

wattunna mengkaalä' dio oloNa.

²⁴ Pakamajakoa' DEBATA, o inggannakoa' umma'Na!

Nakambi' najagai DEBATA to manontom,

sapo' tä' nakaja'-kaja'

ussämbä'i to malangka' penaba.

²⁵ O inggannakoa' to mahannu längäm DEBATA,

potatohoi ammu pakasallei penabammu!

Katillallasanna to diampunniam dosana

32:1-11

32 ¹ Mazmur napapia Daud. Penaniam pepa'guhuam.

Maupa' anna katambasam hupatau to diampunniam pa'pogausam
kadakena,

anna disapuiam dosana.

² Maupa' anna katambasam to tä' napatumäi DEBATA kasalaanna,
tä' deem kende' illaam penabanna pantipuam.

³ Wattunna kusalinnipi dosaku, si malullum bukungku,
anu' mengkaloa' liuä' pusam allo.

⁴ Aka naepe'ä' limamMu allo bengi DEBATA;
tappu' kamatohoangku, susi nadä'dä allo. Sela

⁵ Iya kuakuim dosaku dio oloMu
anna tä' kubuni kasalaangku matim.

Kukattum DEBATA la kuakui asam gau' kusala dio oloMu,
anna muampunniannä' ingganna dosaku. Sela

⁶ Iam too anna si mesa-mesa to meada' dio oloMu la ma'sambajam,
sumala malapako dipellambi'i;

anna mala tä' nalulum ke sulei mala'bu' kasalle illaam salu
katuboanna.

⁷ Iko DEBATA ongeam pembuniangku,
umpa'tippasannä' dio mai kamasussaam.
Meoliä' tilalla', aka puhangko ullangnga'ia'. Sela

⁸ Ma'kada DEBATA naua:

"La kupatuduko anna kupatuhoi
lalam la pahallu muola;

la kunännä'ko anna la kuandaham mata liu.

⁹ Daa ussusi daham battu haka bagal^j tä' deem akkalanna,
manggi' dingangnga' mane maelo'i dipahe',
maka' tää', la moka metuhu'.

^j32.9 *Bagal*: Olo'-olo' susi daham. Ia anna deenni diuaam bagal, aka dipasilakii daham anna keledai, iya dadim diuaam bagal.

¹⁰To tama'Debata ia buda kamasussaam ullambi'i,
sapo' to mahannu längäm DEBATA
nalilim ia pa'pakamajanNa tamalele.

¹¹Kassikoa' ammu tilalla', o inggammua' to malolo gau',
aka indo to napogau' DEBATA;
sikaahhekoa' tilalla', o inggammua' to malolo penaba!

Pampujiam anna pa'pakasalle längäm Puang Allataala

33:1-22

33

¹O inggammua' to malolo gau',

sikaahhekoa' tilalla' längäm DEBATA;

sihatam umpuji DEBATA to malolo penaba.

²Pa'kuhhu' sumanga'koa' längäm DEBATA umponi katapi,
pa'kelonnikoa' katapi sapulo hitinna dio oloNa.

³Penaniannia' penaniam bakahu längäm DEBATA,
pomapi ai de'de'na poni-poniammu anna sikaahhekoa' tilalla'!

⁴Pa'kadanNa DEBATA mala dikatappa'i;
manontom illaam ingganna pa'palakoanNa.

⁵DEBATA umpohäe kamaloloam anna undu' lollä;
ponno lao lino pa'pakamajanNa tamalele.

⁶Ma'battakada DEBATA, iya dadi langi;
menaba, iya dadi issinna langi'.

⁷Umpamesa uwai le'bo' anggasanna uwai dipalimbä,
umpopa'mesa le'bo' kalua' illaam mesa pa'paongeam.

⁸Sihatam sipäto' mengkahea' senambo lino längäm DEBATA,
sihatam sipäto' mentu' issinna lino la tinggi'gi' dio oloNa DEBATA.

⁹Aka ma'battakada DEBATA, iya dadi ingganna-ingganna sia;
umpalao pahenta, iya kende' asam aka-aka.

¹⁰DEBATA umpompoi pattujunna ingganna kahajaam,

ullabai pa'lalam penabanna simesa-mesa kahajaam;

¹¹sapo' pattujunNa DEBATA tatibeho susu' tatidende katonam sule
lako salako-lakona,

pattuju penabanNa ma'tintingam sule lako ampo-ampo.

¹²Maupa' anna katambasam kahajaam, to muaku i DEBATA
mendadi Puang Allataala to napenombai,

kehongko' anna maupa' lako kahajaam to napilei mendadi
umma'Na!

¹³Ma'petua' DEBATA yabo mai suhuga,
ungkamanta-mantai ingganna hupatau.

¹⁴Mennenne' DEBATA yabo mai ongeam kamatandeanNa
umpetua' mentu' issinna lino.

¹⁵Ia umpadadi penabanna hupatau,
nabändä-bändäi ingganna pa'palakoanna.

¹⁶Taia budanna tantaha nasuhum patalo tomahaja,
taia kamatohoanna sohodadu anna malai lappa'.

¹⁷Tä' mala dihannuam daham la mepopatalo,
moinna anna tä' deem pada samatoho, sapo' tä' la mala
melangnga'i.

¹⁸Nakambi' DEBATA ingganna to mengkahea' dio oloNa,

anna to uhhannuam pa'pakamajanNa tamalele.

¹⁹ Nalangnga'i dio mai kamateam,
anna nabanneiam salukatuboanna wattunna illaam kakobeam.

²⁰ Iam too anna la mahannungkia' längäm DEBATA,
aka Ia to umpamoloikia' anna muunta' matoto'!

²¹ Ia nasuhum kende' katilallasam illaam penabanta,
aka takatappa'i sanga masehoNa.

²² La naundu' dakam too napatette pa'pakamajamMu tamalele
DEBATA,
umba susi pahhannuangki matim oloMu.

Pa'kambi'na DEBATA

34:1-23

34 ¹ Mazmur napapia Daud, indo anna naägä'i lelenni umpasala-sala kalena dio olona Abimelekh, nasuhum nasua lao, lambi' le'ba^k.

² La umpujiä' DEBATA illaam mentu' wattu,
tala deem lappa' dio mai pudu'ku kupuji.

³ Penabangku umpa'kasallei DEBATA;
la nahingngi hi too to ussi'dim pandahhaam anna tialai inabanna.

⁴ Maiko tasola pomatande DEBATA,
maikoa' tapada-pada pa'kasallei sanganNa.

⁵ Umpameää' DEBATA, iya natimba'ia',
anna nalangnga'ia' dio mai ingganna kamaheasangku.

⁶ To umpahandam DEBATA la delle' hupanna,
anna tala malea lindo bohho pa'todingam.

⁷ Mengkaala längäm DEBATA inde to kaasi-asi, iya nahingngiam;
nalangnga'i dio mai ingganna kamasussaanna.

⁸ Ingganna to mengkahea' längäm DEBATA nalilim pali' malaika'Na
DEBATA najagai,
anna nalappasam dio mai katilakaam.

⁹ Säändä'i anna pesi'dinnii maaka susi kamapiaam penabanNa
DEBATA!

Maupa' anna katambasam ingganna to mentuhehum lako kaleNa.

¹⁰ Pengkahea'koa' längäm DEBATA, o inggammua' umma'Na
DEBATA,

aka to mengkahea' tä' ia deem la kakuhängam.

¹¹ Tadea' asam ia singa kamatohoanna aka kakuhängam kinande;
sapo' to umpameä DEBATA tä' ia deem la kakuhängam.

¹² O inggammua' änä'-änä', pehingngiiä',
aka la kupatudukoa' mengkahea' längäm DEBATA!

¹³ Mennakoa' maelo' la tubo masannam,
anna maelo' mahendem ussi'dingam kamasannangam?

¹⁴ Jagai pudu'mu indana nakabuttui kada kadake,
anna tula' la mantipu;

¹⁵ Pasikambelai kalemu kakadakeam, ammu pogau' kamapiaam,
peäi lalanna anna kende'i kasiolaam!

¹⁶ Naandaham mata liu ia DEBATA to umpogau' kamaloloam, anna nahingngiam liu ke mengkaalai.

¹⁷ Sapo' napobali ia DEBATA to umpogau' kakadakeam, tala dipahuaim suhi' tadipaalai penaba ke umpelleim lino.

¹⁸ Maka' mengkaala to malolo gau', la nahingngiam DEBATA, anna nalappasam dio mai ingganna kamasussaanna.

¹⁹ Sangkalamma' DEBATA to masussa penaba; anna umpaule penabanna to kattu hannu.

²⁰ Buda kamasussaam natammu to malolo gau', sapo' nalappasam DEBATA dio mai ingganna kaha-kaha ia too.

²¹ Najagai liu DEBATA bätä puntinna, moi la mesa bukunna tala deenni polo.

²² To tama'Debata la mate napobua' gau' kadakena, anna to untkabassi to malolo gau' la dipalambi'i pesämbä'.

²³ DEBATA ullangnga'i bätä sungnga'na ingganna sabua'Na, anna ingganna to mentuhehum lako tä' la napahuai pesämbä'.

Sambajam umpelau pepamolo

35:1-28

35 ¹ Mazmur napapia Daud.

O DEBATA, ebai to umbaliä', bundu'i to umbundu'ä'.

² Pakei unta'-unta'mu anna unta' kasallemu, ammu pengke'de' pamoloiä'.

³ Huntu'i dokemu sola kassaimmu ammu bali to umpadondoä'.

Pa'kadaKo mai muua:

"Kaom too to ullappasangko."

⁴ La malea lindo hi too anna dipakasihi' indo to maelo' umpateiä'.

La kasihisam tubo hi too anna soho' boko' to umpattujuannä' kasägängam.

⁵ La sihhapam di too pa'tappiam naliliam hibu', nahambai lao malaika'Na DEBATA.

⁶ La malillim di too anna malubellu' lalanna, napadondo malaika'Na DEBATA.

⁷ Aka napattiam bäää' pa'pemälängam tä' deem lalanna, anna natolombu bäää' la nasakka tä' deem kasuhunganna.

⁸ La tä' di too deem nabai-bai anna nalambi'i katilakaam.

La ia hi too naala pa'pemälänganna, la mehonno' di too dokko tolobunna anna matei.

⁹ Iya la mua'da'ä' tilalla' aka pa'pogau'na DEBATA, anna tiala inabangku aka nalangnga'ia'.

¹⁰ Ma'kadaä' sola sakalebu penabangku kuua:

"O DEBATA, tä' deem la umpapadaiko!

Ullappasangko to malamma dio mai to matoho,

untässu'iko to mase-mase anna to masussa dio mai to uhappai."

¹¹ Mengke'de' ingganna sa'bi to polima-limaanna umpogau'
kamakahhasam nabaliä',

anna natanda'ä' umpogau' kaha-kaha takuissam laoanna.

¹² Gau' mapiangku napabala'i gau' kadake;
naputu'ä' kakattuhannuam.

¹³ Wattunna silele masaki, umpakeä' poheba bahata anna
mengkakobe;

ma'udum guntu'ä' ma'sambajam,

¹⁴ anggasanna solaku,

anggasanna solasubungku.

Lumukkuä' ussahhoi,

anggasangku to ussahhoi indona aka mate.

¹⁵ Sapo' wattungku mehonno', silele kassi tilalla',
anna naleboä' nabali.

To tama'Debata takattu napakapi'di'ä',
tamonda napetunaä';

¹⁶ kadäkke' gau'na takattu natelleä',
napatikahikkisannä' isinna.

¹⁷ La pada hia umba masäena, DEBATA,
umpahandam-handam bäbää'?

Pesäkäiä' kao dio mai pa'dake-dakena,
langnga'ia' illaam mai alla'-alla'na inde lako singa.

¹⁸ Iya la ma'kuhhu' sumanga'mä' too matim illaam limboam
kasallena hupatau,

anna kupuji sangamMu illaam pa'mesaanna tau buda.

¹⁹ Daa umpabäi ma'petaba lako kaleku
to umpobaliä' tä' deem kasuhunganna.

Daa umpabäi nabillisannä' matanna
to ungnabassiä' tä' deem lalanna.

²⁰ Tä' deem umpassubum tula' kasiolaam;
silele umpattuju kakalasiam

lako to tubo illaam kasiolaam.

²¹ Silele napetaba-tabaiä' naua:

"Uuu, kikalessu'um pa'pogausanna."

²² Sapo' puham muita, DEBATA;

daa ungnanonnä, o Debata,

daa ungnambelaä'.

²³ O Puang Allataala to kupenombai anna Debatangku,
pellimbangongko ammu pengke'de' pa'kadaannä',

hottosannä' kaha-kahaku!

²⁴ O DEBATA Puang Allataala to kupenombai, undusannä'
kamaloloam aka to muundu'ko lollä,

daa umpabäi balingku napetaba-tabaiä'.

²⁵ Daa umpabäi ma'kada illaam penabanna naua:

"Pissi', puhanna' taamma' kalebu.

Sule lakonna' pa'pemulunta!"

²⁶ La malea lindo hi too anna masihi'

to tilalla' muita kamasussaangku.

Pabäi dipetuna anna dipakasihi'
 indo to malangka' penaba dio oloku.

²⁷ La sikaahhe hi too tilalla'
 to maelo' muitaä' dipomalolo!
 La napa'sule-sulei hi too naua:
 "Abana tä' deem pada samatande DEBATA!
 Napemulu la ussi'dim kamalinoam sabua'Na!"
²⁸ Nasuhum tadipolo pudu' tadiletto lila kupengkadaam
 kamaloloamMu,
 anna kupujiko kupa'kasallei pusam allo.

Gau' kadakena hupatau anna kamadotasanNa Puang Allataala

36:1-13

36 ¹ Lu lako to untetem to menani. Mazmur napapia Daud, sabua'na DEBATA.

² Ma'kada-kada dosa illaam unä' penabanna to tama'Debata;
 tä' umpengkahea'i Puang Allataala.

³ Si umpuji kalena,
 nasuhum tä' muissam kasalaanna,
 anna tä' napekadakeam.

⁴ Angga kakadakeam anna kakalasiyam messubum dio pudu'na,
 tä'um deem ma'gau' keaka' anna ma'gau' mapia.

⁵ Umpattuju kakadakeam yabo petindoanna;
 muola lalam kadake,
 tä' untumpu pala' kakadakeam.

⁶ O DEBATA, sondä' längäm langi' pa'pakamajamMu tamalele,
 ussaleho'i gabum kamanontongamMu.

⁷ KamaloloamMu anggasanna tanete handam malangka',
 ulalamMu sihhapam le'bo' handam mandalam.
 Hupatau anna olo'-olo' Iko uningkambi'i unjagai, DEBATA.

⁸ Taditondom angga'na pa'pakamajamMu tamalele, o Puang
 Allataala!

Ingganna ma'hupatau mentiongam nakumbäi pani'Mu.

⁹ Silele tanapuha-puha kinande illaam banuamMu,
 anna umbeem uwai ihu' buttu dio mai salu katilallasamMu.

¹⁰ Iko kalimbuäna katuboam,
 Iko kabuttuanna kamasiäsam to kiongei muita kamasiäsam.

¹¹ Pa'patandaam liui pa'pakamajamMu tamalele lako to muissam
 manappaKo,
 pa'paitaam liui kamaloloamMu lako to malolo penaba.

¹² Daa umpabäi bitti'na to malangka' penaba napa'lullu'ä',
 daa umpabäi limanna to tama'Debata nahambaiä' lao.

¹³ Petua'i, lumbum-lumbummi indo to umpogau' kakadakeam,
 napembantingam Puang Allataala lambi' tä'um nabela bangom
 sule.

Kulle titombonna to tama'Debata tä' umpomasannam penaba

37:1-40

37 ¹ Mazmur napapia Daud.

Daa ummasaha penaba lako to kadake gau',
daa ungkembuhu lako to tama'Debata.

² Aka tä' tia pakala anna malassom sihapam humpu',
anna mabangim susi tanangam.

³ Matappa'ko längäm DEBATA, anna pogau'ko kamapiaam,
tohhoko illaam indo botto anna tontä liuko manontom.

⁴ Tillalla'ko aka DEBATA,
anna Iai umpasulelakoangko pa'pemulummu.

⁵ Behoi sakalebu salukatuboammu längäm DEBATA, matappa'ko
lako,

anna Iai ma'palako.

⁶ La napa'patandaam DEBATA kamaloloammu umba susi
pangkähhäna mata allo,

anna kamahändäam penabammu umba susi allo masiä'.

⁷ Pomasannanni penabammu dio olona DEBATA,
sa'baha'ko ampai pepamoloNa.

Daa uhhahu' muita to masannam katuboanna,
battu haka to umpogau' kakalasiyam.

⁸ Tähänni aha'mu, anna mondangko buhassuam,
aka anggam tia umpakende' kakadakeam.

⁹ Aka to umpogau' kakadakeam la dipempa'deam,
sapo' to mahannu längäm DEBATA la umpomana' botto ia too.

¹⁰ Tä'um la masäe anna pa'dem to tama'Debata;
maka' dipeä lako ongeanna, tä'um deem dilambi' dio.

¹¹ Sapo' to mahempo penaba la untadongkonni botto ia too,
anna ussi'dim kamasannangam sanda silapi'.

¹² To tama'Debata umpattujuam kakadakeam to malolo gau',
anna tikahikki' isinna muitai.

¹³ Sapo' napetaba la'bai Debata indo to tama'Debata,
aka naissam naua muolam lalam buana gau' kadakena tau ia too.

¹⁴ Ussintä' pa'danna to tama'Debata anna umpasam bälä'du'na
la undahha to mase-mase anna to masussa,
la umpatei to malolo gau'.

¹⁵ Sapo' la ia leko' di nakumbali' pa'danna,
anna dipolo-polo bälä'du'na.

¹⁶ Masannam puha ia penaba untingngajo baham-baham saidi'na
to malolo gau',

anna la baham-baham titombonna to tama'Debata.

¹⁷ Aka dipolo-poloam limanna to tama'Debata,
sapo' DEBATA la umpasukum to malolo gau'.

¹⁸ Napoissam DEBATA salukatuboanna to tubo maseho,
anna la naampuam liu indo mana'na dio mai DEBATA.

¹⁹ Tä' deem la nahuham longko' illaam kamasippisam,
anna la bosa' illaam wattu kakobeam.

²⁰ Sapo' to tama'Debata ia la ullambi' kamateam,
balinna DEBATA la mahakasa susi bunga-bunga lako kaliane,
anna la pa'de bābā susi hambu.

²¹ Indo to tama'Debata si ma'indam anna tä'i naaku nabaja',
sapo' to malolo gau' ia ponno pa'kamase anna lempam
pa'pakamaja.

²² Menna-menna natamba' DEBATA la untadongkonni indo botto
namanasam DEBATA,
sapo' to nahua tädona DEBATA la dipempa'deam.

²³ DEBATA umpomanontom pentekkana

to napohäe DEBATA katuboanna.

²⁴ Maka' metobä, tä' la sägä,
aka natette DEBATA limanna.

²⁵ Duam beluä' kududum,
tä'pi deem kuita to malolo gau' la natampeam DEBATA,
battu haka pessubunna la kapala'-pala' kinande.

²⁶ Si ma'pehabe' liu anna ma'kamase,
ingganna änä'na mendadi tamba' lako kalena.

²⁷ Pasikambelai kalemu kakadakeam ammu pogau' kamapiaam,
iya la untadongkonni too indo litä' sule lako ampo-ampomu.

²⁸ Aka napohäe Ia DEBATA undu' lollä,
anna tä' deem untampeam to meada' dio oloNa.

Nakambi' liu sule lako salako-lakona,
sapo' pessubunna to tama'Debata la dipempa'deam ia.

²⁹ To malolo gau' la umpomana' botto ia too,
anna la natadongkonni sule lako salako-lakona.

³⁰ Pudu'na to malolo gau' umpassubum kakeakasam,
anna lengko lilana umpengkadaam undu' lollä.

³¹ PaondonNa Puang Allataala to napenombai napaillaam penaba
liu,
pentekkana tala lempä kanam tala lempä kaihi.

³² To malolo gau' napaimatanna to tama'Debata
anna napeä lalanna la napatei.

³³ Sapo' tä' napabäi DEBATA la honno' dokko pala' limanna to
tama'Debata,
tä' toi napabäi la dipassala wattunna dihotto'.

³⁴ Mahannuko längäm DEBATA anna tuhu'i ulalanNa,
iya la naäkä'ungko too umpomana' pa'bottoam ia too;
anna la muitako to tama'Debata dipempa'deam.

³⁵ Deem kuita to tama'Debata mata'go'-ta'go',
mapi'dä' katuboanna,
sihhapam kaju tumalubum dio botto ia too.

³⁶ Tappana liu, iya pa'de bābām,
kupeä sapo' tä'um deem kulambi'.

³⁷ Petua' siai too indo to ma'penaba sambulo-bulo anna to malolo
penaba;

to umpohäe kasiolaam la mapia katuboanna illaam allo la naoloinna.

³⁸ Sapo' to untekka pahenta DEBATA la dipatei; anna pahhannuanna to tama'Debata la tubo masäe, la dipempa'deam.

³⁹ Nalangnga'i ia DEBATA to malolo gau', anna nahindim illaam kamasippisam.

⁴⁰ Napamoloi anna nalappasam, nalangnga'i dio mai pala' limanna to tama'Debata, aka Ia napentuhehunni.

Sambajam wattunna illaam kamasussaam

38:1-23

38 ¹ Mazmur napapia Daud anna mala natingngajo DEBATA.

² O DEBATA, illaam aha'Mu daa untappakadaia', illaam aha' kasalleMu daa umpassalää'.

³ Nalosa lappa'ä' batu balä'du'Mu, tä' deem pada samabanda' katea'Mu muepe'ä'.

⁴ La hubu' asam kaleku napobua' aha' kasalleMu; malussem bukungku napobua' dosaku;

⁵ nakabu' ulungku kasalaangku; sihhapam babaam mabanda' nalokkonnä'.

⁶ Bubosi kämbäku pe'nana, aka natumä katomahoangku;

⁷ ma'dongkoä', la tihuku; pusam allo mellaoä' masussa penaba.

⁸ Nakahammunniä' pi'di' äbä'ku, La hubu' asam kaleku;

⁹ malu'bä' kaleku anna dahi pikkolli', kangahe-ngaheä' aka masussa penabangku.

¹⁰ O DEBATA, muissam asam pa'pemulungku, anna pengkaloa'ku lampa'-lampa' asam dio oloMu;

¹¹ ma'gändä-gändä buaku, mäläi bukungku, anna takuitam mennenne'.

¹² Ingganna sangkalamma'ku anna solaku napessalaannä' aka sakingku,

anna mentu'na kasahapuanguku nakambelää'.

¹³ Ingganna to mohäe umpakattu sungnga'ä' napattiammä' poja; to maelo' umpeängannä' katilakaam, napikkisannä' kasägängam, anna napattujuannä' kaha-kaha tatappa' pusam allo.

¹⁴ Sapo' ma'binga-binga mandä' sihhapam to binga, tä' pahingngi, muammu'ia' pudu'ku anggasanna to pepe tanaissam ma'kada.

¹⁵ Abana, anggasanguku si'da to tä' pahinggi, tä' deem manteläi.

¹⁶ Aka Iko kuhannuam, DEBATA, Iko la mentimba', Debata, Puang Allataala to kupenombai.

¹⁷ Iya kuuam: "Assala'na hia tää'i muäde-äde tillalla' muita sussaku,

tä' tumonga pundu dio oloku ke sala' tä'dä'ä'!"

¹⁸ Aka saidi'mä' tamehonno',
anna nahimpi'-himpi' pi'di' kamasuszaam;

¹⁹ kuakuim ingganna kasalaangku;

masaha penabangku aka dosaku.

²⁰ Tä' deem pada sabuda balingku anna matoho,

tä' deem pada samekahea'-hea' to ungrabassiä' tä' deem lalanna;

²¹ napabala'i kakadakeam gau' mapiangku,

napobaliä' aka umpogau'ä' kamapiaam.

²² O DEBATA, daa untampeannä',

o Puang Allataala to kupenombai, daa ungrababela!

²³ Simpanii umpamoloiä',

o Debata, to ullappasannä'!

Sambajam umpelau pepamolo

39:1-14

39 ¹ Lu lako to untetem to menani. Mazmur napapia Daud. Lu lako Yedutun.

² Kuua: "La unjagaiä' kaleku,

indana lengko lilaku umbabaä' lako kamadosaam;

La ungrabuä' pudu'ku,

ke lakopi ampe'ku to tama'Debata."

³ Untutu'ia' pudu'ku, mengkamma'

tapandiu-diu, moi la kamapiaam tala kutula'i;

sapo' tuttuam mabanda' di sussaku.

⁴ Suhhä' buaku,

sundällä' sihhapam api, wattungku kabenga'-benga';

ma'kadamä' kuua:

⁵ "O DEBATA, paissanniä' piham lambi' kannu'ku,

anna pada umba lämpä'ku,

anna mala kuissam kuua liu lalam katuboangku!

⁶ Mannassa, anggam sanaka däkänna umpa'tantu katuboangku;

situhu' Iko, tama'battuam masäena katuboangku.

Mannassa, ingganna hupatau sihhapam hibuu' tibussau! Sela

⁷ Anggam liu lalam tikalibajo!

Bassa' takeguna;

untombom kulle di lino, sapo' tä' naissam menna la umpota'genai dako'.

⁸ Tentomai, akam la kupemmitai, Debata?

Anggam Iko hannuangku.

⁹ Lappasannä' dio mai ingganna gau'ku sala basabaku lenda,

daa umpabäiä' napetuna to tana' tama!

¹⁰ Mengkamma'ä', kututu'i pudu'ku,

aka ma'kaleko ma'palako.

¹¹ Patohhom pesämbä'Mu lako kaleku,

dahi pukkollia' nadanta' limamMu.

¹² UntappakadaiKo hupatau

umpassala aka kasalaanna,

umpadahi kapu' ingganna napohhä'di'na, sihhapam naande panapu';
 mannassa, katuboanna hupatau sihhapam hibu' tibussau. Sela
¹³ Pehingngii sambajanku DEBATA,
 patanannii talinga pengkalaanku umpelau pepamolo,
 daa umpahandam-handam bäbää' wattunna tumahämpä' uwai matangku!
 Aka messihuhüä' dio oloMu,
 to suleä' susi nene to kuponene.
¹⁴ Pasalaiä' mata aha'Mu,
 anna mala kassiä' tilalla'
 yolona anna la kutampeam inde lino anna tä'mä' deem la diita pole!"

Pa'kuhhusam sumanga' anna sambajam

40:1-18

40

¹ Lu lako to untetem to menani. Mazmur napapia Daud.

² Sa'baha'ä' umpemmitai DEBATA;
 lambi' natingngajoiä' anna nahingngiam pengkaalaanku.

³ Naangkahannä' dio mai gahoä mandalam,
 dio mai pullam mapullu';
 napake'de'ä' yabo tanete batu,
 napasitontongam pentekkaku.

⁴ Napakende' penaniam bakahu dio pudu'ku,
 penaniam pampujiam längäm Puang Allataala to tapenombai.
 Buda tau ussa'bii anna mengkahea',
 lambi' mahannu längäm DEBATA.

⁵ Maupa' anna katambasam to mahannu längäm DEBATA,
 to tä' mahannu lako to malangka' penaba,
 tä' mengngolo lako to muundu'i kakalasiama.

⁶ O DEBATA, Puang Allataala to kupenombai, buda punalam puha umpogau',

pa'pogausam memängä-mängä anna pattujumMu lako kami'.
 TadisihanteangKo tadisipadai!
 Mohäeä' la kutula' anna kupa'paissangam,
 sapo' buda sugali' bilanganna.

⁷ Tä'Ko umpohäe tunuam anna kinande dipemalasangam,
 sapo' Iko umpatitungkasannä' talinganku;
 tunuam ditunu mampu' anna tunuam pebasei dosa tä' umpameä.

⁸ Mane ma'kadaä' kuua: "Petua'i, sulemä';
 illaam suha' tilulum deem tituli' diona kaleku;

⁹ Kupohäe umpalako pa'elo'Mu, o Puang Allataala, to kupenombai;
 PaondomMu tianna illaam penabangku."

¹⁰ Kupa'paissangam undu' lollä
 illaam hempungam kasallena hupatau;
 tä' kututu'i pudu'ku,

umba susi puha muissam DEBATA.

¹¹Undu' lolläMu tä' kuammui'i illaam penabangku,
kamanontongamMu anna pallangnga'imMu kupengkadaam,
pa'pakamajamMu tamalele anna kamaloloamMu tä'
kupengkammasam
illaam hempungam kasallena hupatau.

¹²O DEBATA, daa untähänni pa'kamaseMu lako kaleku;
la tontä liu hi too naonganniä' pa'pakamajamMu tamalele anna
kamaloloamMu!

¹³Napali' tintinnä' katilakaam,
tadikemba' dihekem bilanganna.
Napadondo mäne'-mäne'ä' kasalaangku,
lambi' tamalamä' mennenne';
buda puha ia bilanganna anna la beluä' yabo ulungku,
nasuhum kattu hannumä'.

¹⁴O DEBATA, kela mala ullangnga'ia',
o DEBATA, simpannii umpamoloiä'!

¹⁵La malea lindo hi too anna masihi'
ingganna to mohäe la umpakattu sungnga'ä';
la kasihisam tubo hi too anna soho' boko'
ingganna to umpeängannä' kasägängam.

¹⁶La tippallem di too buana anna masihi'
ingganna to untelleä' naua: "Uuu!"

¹⁷La kassi hi too anna tilalla' ingganna to umpameäKo,
aka Iko nasuhum;
la ma'kada liu hi too ingganna to umpemulu pallangnga'i buttu di
Iko naua:

"Kapuangam DEBATA!"

¹⁸Kao inde masussa anna mehio-hio,
sapo' naandaham mata liuä' Debata.
Iko umpamoloiä' anna ullangnga'i,
o Puang Allataala to kupenombai, daa muanda bale'i!

Sambajam umpelau kabonosam

41:1-14

41 ¹Lu lako to untetem to menani. Mazmur napapia Daud.

²Maupa' anna katambasam to umpikki' to mase-mase;
la nalangnga'i DEBATA illaam wattu kamasippisam.

³DEBATA la unγκambi'i bätä puntinna anna napaliaha bätä
sungnga'na,

la napomasannam illaam botto litä'na;
tä' umbeho DEBATA la napoelosam elo' balinna!

⁴DEBATA sussaheanna dio petindoanna wattu masaki,
napatibangom sitonda kamaläpusam dio mai kamasakianna.

⁵Sapo' kao-kao, kuua: "Kamaseiä' DEBATA,
pabono'i sakingku, aka madosää' lako kaleMu!"

⁶Napelalanniännä' kakadakeam balingku naua:

"Kela matem, anna pada pa'dei sanganna?"

⁷To sule muolläiä', tä' sule tama penabanna;
deem dia pattuju kadakena,
mane le'ba'i napobungam bibi lako dio mai.

⁸Ingganna to ungnabassiä' sikabisi' natula' kadakeä',
napelalanniännä' kakadakeam naua:

⁹"Natappai saki tanggana-gana,
metindona too, siotto'um petindoanna."

¹⁰Meangga sassipakamajangku to handam kukatappa'i,
to mesa ande mesa ihu'kam,
napenggihä'ä' la nalappi'.

¹¹Sapo' Iko DEBATA, kamaseiä' anna patibangonnä',
anna mala kupabala'i gau' kadakena.

¹²La kuissammi too kuua,
umpohäeä' DEBATA,
ke tää'i umpabäi balingku natalaoiä'.

¹³Sapo' kao kao, Iko ussamba' matoto'ä' aka unä' penaba
sambulo-buloku,
Iko umpake'deä' matoto' dio oloMu sule lako salako-lakona.

¹⁴Dipuji dipa'kasallei DEBATA, Puang Allataala to napenombai to
Israel,
mengkalao dio mai, sule lako salako-lakona!
Amin, Amin!

LESOAM KADUANNA:

MAZMUR 42--72

Kamamallisam lako Puang Allataala

42:1--43:5

42 ¹Lu lako to untetem to menani. Penaniam pepa'guhuam napapia
pessubunna Korah.

²Umba susi jonga muinaba-naba uwai salu,
susim too duka' sungnga'ku muinaba-nabaKo, o Puang Allataala.

³Sungnga'ku mabähäm lako Puang Allataala,
lako Puang Allataala DEBATA tubo.
Piham dia malaä' sule silindo Puang Allataala?

⁴Sitammi'ä' uwai matangku
allo anna bengi,
aka allo-allo ma'kada balingku lako kaleku naua:
"Umba hi Puang Allataala to umpenombai?"

⁵Indem ia la kupaalai penabangku,
inde mahassam masussa penabangku;
la kuaka susi mellao lako olona tau sipina'-pina',
umpendioloanganni le'ba' tama banuanNa Puang Allataala
dipasindum muahhe tilalla' anna umpenanium penaniam
pa'kuhhusam sumanga',

illaam pa'hame-hameanna tau buda umpakahoa' allo kasalle.

⁶ O penabangku, akanna masussako?

Akanna tahapa'ko kusi'dim?

Mahannuko längäm Puang Allataala! Aka la ma'kuhhu' sumanga'

omä' sule dio oloNa,

to ullangnga'ia' anna Puang Allataala to kupenombai!

⁷ Mahusa' penabangku kusi'dim,

nasuhum tihaka'ä' matim oloMu,

moi dioä' lembäna Yordan, anna tanete Hermon,

moi yaboä' tanete Mizar.

⁸ Tä' deem kattu natalappi'ä' kahusasam, sihhapam palämpä

kasalle,

nalelu'ä' kamasussaam, sihhapam tibusona mala'bu' masambam.

⁹ DEBATA ussa pa'pakamajanNa tamalele wattu masiä,

anna wattu bengi umpengkamahaannä' penaniam,

ma'hupa sambajam längäm Puang Allataala too'na katuboangku.

¹⁰ Ma'kadaä' längäm Puang Allataala buntu batungku kuaa:

"Akanna umpa'kalembeimä'?

Aka hia anna nahuaä' sussa tanggana-gana,

napakamase-mase balingku?"

¹¹ Sihhapam doke pamoso nabuno sule tama buaku,

natelleä' nasassai balingku,

allo bengi ma'kada naua: "Umba hi Puang Allataala to

umpenombai?"

¹² O penabangku, akanna masussako?

Akanna tahapa'ko kusi'dim?

Mahannuko längäm Puang Allataala! Aka la ma'kuhhu' sumanga'

omä' sule dio oloNa,

to ullangnga'ia' anna Puang Allataala to kupenombai!

43 ¹ O Puang Allataala, undusannä' lollä,

pekkalundanganni kaha-kahaku

lako hupatau to tameada'!

Langnga'ia' dio mai to manipu anna maneko!

² Aka Iko Puang Allataala bettem matoto'ku kuongi mentuhehum.

"Akanna untibemä'?

Aka hia anna nahuaä' sussa tanggana-gana,

napakamase-mase balingku?"

³ Pasulei kamasiäsamMu anna kamaloloamMu,

anna mala natetennä',

anna napatette längäm tanete masehoMu,

ongeam tadongkongamMu!

⁴ Lambi' malaä' tinanda lako ongeam pehumalasang längäm Puang

Allataala,

mengngolo lako Puang Allataala kabuttuanna kakassiangku anna

katilallasangku,

anna ma'kuhhu' sumanga'ä' matim oloMu kupasindum ma'katapi,

o Puang Allataala,

Puang Allataala to kupenombai!

⁵ O penabangku, akanna masussako?

Akanna tahapa'ko kusi'dim?

Mahannuko längäm Puang Allataala! Aka la ma'kuhhu' sumanga'
omä' sule dio oloNa,
to ullangnga'ia' anna Puang Allataala to kupenombai!

Pengkaloa'na to nahimpi' pi'di' kamasussaam

44:1-27

44 ¹Lu lako to untetem to menani. Mazmur napapia pessubunna Korah. Penaniam pepatuduam.

²O Puang Allataala, kihingngim sola talingangki,
puha napaondongangkam nene to kipunene
diona pa'pogausamMu to puha umpalako wattunna linonaipi,
wattu lino yolo.

³Ma'kale limamMu uhhisi lao buda kahajaam,
anna umpatadongkonni neneki botto litä'na;
simesa-mesa kahajaam undappo'i,
sapo' neneki, ma'tällä matoosam ma'abo' mahapuum.

⁴Taia mataham napake lambi' natadongkonni inde pa'bottoam;
taia katea' kalena umbeenni kapapataloam,
sapo' katea' bassimMu, katea' tabimMu, anna pamballoinna
lindoMu,

aka masannam penabamMu lako.

⁵Ikom too Tomahajanku anna Puang Allataala to kupenombai,
to umpa'tantu kapataloanna pessubunna Yakub.

⁶Iko nasuhum umpasosso'kam mentu' balingki,
sangamMu nasuhum kilullu' pahe käppi' ingganna to mengke'de'
umbundu'kam.

⁷Aka taia bälä'du'ku kuhannuam,

taia pa'dangku umbeennä' kapataloam,

⁸sapo' Iko umbeengkam kapataloam lako mentu' balingki,
anna ingganna to ungabassikam umpakasihi'.

⁹Nasuhum kipa'kassiam Puang Allataala allo sibala' allo,
anna la kipuji sangamMu sule lako salako-lakona. Sela

¹⁰Sapo' temo, untibengkam anna umpakasihi',
tä'ungKo ussahum mentu'na tantahaki illaam pa'bundusam.

¹¹Iko nasuhum ma'sohoboko'kam dio mai balingki,
anna ingganna to ungabassikam mamuhu.

¹²Umpebeengkam sihhapam domba la ditunu,
anna umpatisembu' dalle battekam lako buda kahajaam.

¹³Umbalu' tasihua'-hua'Ko umma'Mu,
anna tä' deem kauntungam muala illaam mai.

¹⁴Umpadadikam napetuna botto sikahuku'ki,
napetaba-tabai anna natelle to ulilingkam.

¹⁵Umpadadikam petabaanna buda kahajaam
silele muilim-ilim ma'piu'.

¹⁶Pusam allo umpendudunnä' sihi',
malea lindo bohho pa'todingam,

¹⁷uhhingngi tula' pantelle anna pa'petuna
messubum dio pudu'na bali anna to ma'patumpui.

¹⁸Ingganna ia too puha asammakam nahua, sapo' tä'Ko deem
dipa'kalembei,

anna tä' deem kitekka pa'dandiamMu.

¹⁹Tä' deem lempä penabangki matim,

tä' deem tieli' lingkaki dio mai ulalamMu,

²⁰sapo' umpadahi kapu'kam dio ongeanna serigala¹,
anna umpasapu'ikam kamalillingam.

²¹Hapanna umpa'kalembeikam sangana Puang Allataala to
kipenombai,

anna ma'balla' pala' lakokam debata senga',

²²tä' daka tia la nalosa siam Puang Allataala?

Aka Ia ullosa limbä untahhu' mandalam!

²³Allo-allokam la dipakattu sungnga' kahana kituhu'Ko,
dipasusingkam kami' domba la ditunu.

²⁴Milli'Ko! Akanna mamma' dako Iko, Debata?

BangongKo! Daa untibe tahhu'kam!

²⁵Akanna umpemboko'ikam,

anna umpa'lembe-lembei pi'di'ki anna pandahhaangki?

²⁶Tihongkä' di sobä' sungnga'ki,

bandam-bandam di litä' bätä puntingki.

²⁷Pengke'de'Ko, ammu pamoloikam,

lappasangkam aka pa'pakamajamMu tamalele!

Penaniam kakebaineanna tomahaja

45:1-18

45¹Lu lako to untetem to menani. Situhu' ajanganna penaniam:
Bunga bakung. Mazmur napapia pessubunna Korah. Penaniam
pepatuduam; penaniam elo' bunga-bunga.

²Lempam kada pantede illaam penabangku,
la kupalanda' tula' pantono' kaleku lako tomahaja;
lengko lilaku sihhapam petuli'na to majatta mantuli'.

³Iko handam maleke illaam alla'-alla'na hupatau,
mahambem malute pessubungam pudu'mu,
nasuhum natamba'ko Puang Allataala
sule lako salako-lakona.

⁴Takinni pa'dammu, o tomahaja pa'bahani,
illaam kamatandeammu anna kamasokangammu!

⁵Illaam kamasokangammu, pa'dahangko ammu patalo lambi'
titande kamaloloam,

kamahammesam anna undu' lollä!

Katea' bassimmu umpaitaiko pa'pogausam mepilla'-pilla'!

⁶Balä'du' massa'di'mu, ullosa lappa' ba'ba buana balimmu;
buda kahajaam tiampa' dio olomu.

⁷O Puang Allataala, okkosam kahajaamMu la tontä liu sule lako
salako-lakona,

¹44.20 Dio ongeanna serigala: Mala duka' diua, mendadi ongeam maitu-itu.

tekkem dipappa'Mu, tekkem muundu' kamaloloam.

⁸Umpohäeko kamaloloam, anna ungnkabassiko kakadakeam;
iam too nasuhum Puang Allataala, Puang Allataala to umpenombai,
nalanti'ko natolloi minnä'-minnä' to umpasundede buamu,
untodom solamu.

⁹Mentu' pohebamu bubanau' susi mur, gaharu, anna cendana;
dihingngi humiti' katapi illaam mai banua kahajaam dibelo-beloi
toha gaja umpatjala inabammu;

¹⁰illaam alla'-alla'na baine to dikasalleam tadongkom
sanaka-naka baine änä'na tomahaja,
dio tandai kanammu ke'de' baine tomahaja
ma'poheba dibelo-beloi bulabam buttu dio mai Ofir.

¹¹O änä' daha, pehingngii, paalai penaba, anna patanannii
talinga tula'ku,

pasalai pikkiham botto litä'mu anna mentu' kasahapuammu!

¹²La kende' di too elo' bunga-bunganna tomahaja aka
kamapiaanna hupammu.

Ia puämu, penombako dio olona!

¹³Sule änä' daha dio mai Tirus^m umbaba pa'lalam penabanna,
deem to makaka illaam alla'-alla'na maelo' la naala penabammu.

¹⁴Mekuhita' indo änä' daha to la napobaine tomahaja la mentama
banua kahajaam,
ma'poheba disumma' bulabam;

¹⁵ma'poheba sanda dio hupanna, dipasola menggolo lako
tomahaja;

natuhu' buda änä' daha, änä' daha sabainena,
la tinanda lako olona.

¹⁶Silele sikaahhe tilalla' dipasola lao,
dipasola mentama banua kahajaam.

¹⁷Ingganna pessubummu muane la umpessulle okkosam
kahajaanna nene to umponene;

la muäkä' mendadi to kuasa senambo lino.

¹⁸La kupakaleleam sangammu lako ingganna lapi'na hupatau,
nasuhum ingganna kahajaam napujiko napa'kasallei sule lako
salako-lakona.

Puang Allataala hindim batu papa uhu

46:1-12

46 ¹Lu lako to untetem to menani. Mazmur napapia pessubunna
Korah. Penaniam. Situ'hu' ajanganna penaniam: Alamot.

²Puang Allataala pentuhehunganta anna kamatohoanta;
tatilio-lio matanNa mepamoloi illaam kamasippisam.

³Nasuhum tala häntäki' tala sumojä,
moi la kakemba-kemba lino,
moi tallam tanete dokko le'bo';

^m45.13 Änä' daha dio mai Tirus: Kalembasanna, issinna Tirus.

⁴ moi la magaluntu' uwai le'bo' anna tilulum bombam,
moi la pahundam tanete nata'du. Sela

⁵ Pallessä'inna mesa salu umpatjala inabanna
kota tadongkonganNa Puang Allataala, ongeam maseho naongi
ma'ohoam To Handam Matande,

⁶ Puang Allataala tadongkom illaanna, tatige'ge' tatigesse kota ia
too;

napamoloi Puang Allataala ke tibukka'um baja.

⁷ Mahamba buda kahajaam, tige'go' simesa-mesa kahajaam;
umpa'pahingngiam kamahanna Puang Allataala, lambi' mahehe
pallam lino.

⁸ DEBATA To Handam Kuasa passappi' matoto'ta,
Puang Allataala to napenombai Yakub hindim batunta papa uhunta.
Sela

⁹ Maiko, petua'i pengkähäna DEBATA,
DEBATA to umpadahi kapu' lino,

¹⁰ Umpamonda kasianu-anuam illaam lino,
umpolo-polo bälä'du', uhheppo'-heppo' doke,
untunu mampu' ingganna unta'!

¹¹ Ma'kada naua: "Mattangkoa' ammu pengngissannii, Kaom too
inde Puang Allataala!

La dipomatandëä' illaam alla'na buda kahajaam,
la dipomatandëä' illaam lino!"

¹² DEBATA To Handam Kuasa passappi' matoto'ta,
Puang Allataala to napenombai Yakub hindim batunta papa uhunta.
Sela

Puang Allataala umpahenta senambo lino

47:1-10

47 ¹ Lu lako to untetem to menani. Mazmur napapia pessubunna
Korah.

² O inggannakoa' hupatau, pa'sappa-sappakoa',
sikaahhekoa' tilalla' mengkamaha lako Puang Allataala!

³ Aka DEBATA To Handam Matande, tä' deem pada samepapilla'
memängä-mängä,

Tomahaja Matande umpahenta senambo lino.

⁴ Untaloi buda kahajaam napadokko lisu pala'ta la takuasai,
mentu'na kahajaam napadio pehhondoam bitti'ta.

⁵ Napileiangki' botto litä' la tapomana' ma'tintingam,
umpasundede buana pessubunna Yakub to napakamaja. Sela

⁶ Puang Allataala längäm ongeam kamatandëanNa natuhu' to
sikaahhe tilalla',

DEBATA, nalahu to umponi sangkakala.

⁷ Penanikoa' puji Puang Allataala, penaniangkoa' pampujiam,
penanikoa' puji Tomahajanta, penaniangkoa' pampujiam!

⁸ Aka Puang Allataala Tomahajanna senambo lino,

penanikoa' penaniam pantede!

⁹Puang Allataala tomahaja umpahenta ingganna kahajaam;
Puang Allataala untadongkonni okkosam kahajaanNa
tangkapohasam tangkabissisam.

¹⁰Ingganna to palumbängam lako simesa-mesa kahajaam
ma'hempum

mendadi umma'Na Puang Allatala to napenombai Abraham.
Aka Ia umpuängäm mentu'na to uhhindim hupatau illaam lino;
Puang Allataala tä' deem pada sadipomatande.

Sion, kota tadongkonganNa Puang Allataala

48:1-15

48 ¹Mazmur napapia pessubunna Korah. Penaniam.

²Tä' deem pada samatande DEBATA, anna tä' deem pada
sadipa'kasallei

illaam kota tadongkonganNa Puang Allataala to tapenombai!

³Tanete masehoNa, malangka' mapia,
umpatiala inabanna senambo lino;

tanete Sion, dio tandai utara,
kota tadongkonganNa Tomahaja Matande.

⁴Dio bettena,
Puang Allataala umpa'paissangam kaleNa mendadi bettem
matoto'na.

⁵Petua'i, ussahandanni kada buda tomahaja,
sasuleam la ma'bundu';

⁶tappana muita bettena kota silele pilla' mängä-mängä,
tikkedu', lambi' sikalumpa' taia inabanna.

⁷Silele lumalla' mahea';

hassä' lindona, anggasanna to mangnguhiba',

⁸umpadahi kapu', sihhapam kappala' Tarsis natappi hibu' tandai
mata allo.

⁹Umba susi puha tahingngi sola talinganta, taita sola matanta,
illaam kota tadongkonganNa DEBATA To Handam Kuasa,
illaam kota tadongkonganNa Puang Allataala to tapenombai;
nasamba' napasukum sule lako salako-lakona. Sela

¹⁰O Puang Allataala, kipasalui penaba pa'pakamajamMu tamalele,
illaam ongeam masehoMu.

¹¹O Puang Allataala, umba susi sangamMu kaleleam illaam lino,
susim too duka' dipujiKo dipa'kasallei

sule lako lili'na lino;

katea' bassimMu unte'geham kamaloloam.

¹²Pahallu umpakende' kakassiam tanete Sionⁿ;

pahallu umpakende' katilallasam to untadongkonni Yehuda^o,
aka muundu'Ko lollä uhhotto' hupatau!

ⁿ48.12 *Tanete Sion*: Kalembasanna issinna kota Yerusalem.

^o48.12 *To untadongkonni Yehuda*: Naua illaam basa aslinna, änä' daha Yehuda.

¹³Lilinnii tanete Sion^p, penggulilinnii lao pali',
 ammu hekenni lempo pahhondaanna,
¹⁴petua'i tembo'na, pahessai bettenna,
 anna mala muissam untulasam pessubummu allo di dako'na
 muua:
¹⁵"Iam too inde Puang Allataala,
 Puang Allataala to tapenombai sule lako salako-lakona!
 Iam too umpatetteki' upu' lino."

Tä' mala dihannuam kulle di lino

49:1-21

49 ¹Lu lako to untetem to menani. Mazmur napapia pessubunna Korah.

²Patanannia' talingammu, o inggannako hupatau,
 palempei sulim patomalimmu, o mentu'nako issinna lino,

³susi to bahinni' teem to kasalle,
 susi to mase-mase teem to makaka tä' deem se'lan!

⁴Pudu'ku la umpassubum tula' ponno kakeakasam,
 issi penabangku mebeem kapaissangam.

⁵La kupatananni talinga tula' to keaka',
 la kupomasiä' kalembasanna kada passelonni kupasindum
 ma'katapi.

⁶Akanna la mahea'ä' muoloi wattu kamasussaam,
 wattunna nalimbu tamaä' balingku to tama'Debata,

⁷to umpopa'attaham katomakakaanna,
 anna umpa'kassiam kulle budanna?

⁸Tä' deem podo la mesa tau la mala ussolom solana,
 battu haka la ullombunni sungnga'na dio oloNa Puang Allataala.

⁹Aka tä' deem pada samasuli' pelombunninna sungnga',
 moi la aka tala malai disolongam,

¹⁰lambi' tubo sule lako salako-lakona,
 lappa' dio mai ba'ba talumbä.

¹¹La nakannasai, naua:
 to keaka' naande kamateam, to maho anna to maho kalebu,
 pada-pada naande kamateam,
 anna ingganna kulle pa'tampena, la napota'gena tau senga'.

¹²Ku'bu'nam la napobanua sule lako salako-lakona,
 la naongeti tohho situngguam;
 ingganna litä'na yolona nakona mandam.

¹³Sapo' moi la umba susi katomakakaanna hupatau, tä' siam la
 da'da' liu;
 la pa'de siam, umba susi olo'-olo' mate.

¹⁴La susim too ullambi'i to uhhannuam kamatohoam kalena,
 katihotosanna to umpopa'attaham pangngoko di tambu'na. Sela

¹⁵Susi domba, silele tinanda lako kaliane anitu,
 nakuasai kamateam;

la nadakka' to malolo gau' wattu mebengngi',
 bosì bätä puntinna dio ongeam tomate,
 sikambelam ongeam kamasannanganna.
¹⁶ Sapo' Puang Allataala la ullangnga'i sungnga'ku,
 dio mai pantakka'na kaliane anitu,
 napatinanda dio olo kamatandeanNa. Sela

¹⁷ Daa ummahusa' ke tomakakai mesa tau,
 anna tuttuam längäm katuboanna illaam dapo'na,
¹⁸ aka matei too tä' siam la umbaba katomakakaanna,
 tä' siam la umbaba kullena lako ku'bu'.
¹⁹ Moi la masannam katuboanna inde lino,
 moi la napakate'de' hupatau
 aka manähä ussalu salukatuboanna,
²⁰ sapo' la tinanda siam duka' lako ongeanna nene to naponene,
 tala deemmi muita pole paindona masiä sule lako salako-lakona.
²¹ Hupatau to ponno yabo ponno dio, sapo' tamuissam se'la,
 la pa'de siam, umba susi olo'-olo' mate.

Bua pemala' pa'kuhhusam sumanga'

50:1-23

50 ¹ Mazmur napapia Asaf.

Puang Allataala, DEBATA To Handam Kuasa ma'battakada,
 untambai issinna lino,
 mengkalao illaam mata allo sule sau' katampusam.
² Yabo tanete Sion, ongeam mekuhita' mapianna,
 diita Puang Allataala pangkähhä mesilo.
³ Sule Puang Allataala to tapenombai, anna tä' sule kanonnä bääbä,
 mellelo api dio oloNa,
 nalilim pali' talimpuhu' masambam.
⁴ Metamba längäm langi',
 meoli lako lino la mendadi sa'binNa uhhotto' umma'Na.
⁵ Ma'kada naua: "Popa'mesannä' dio oloKu ingganna hupatau to
 manontom lako kaleKu,
 to puha kusitallisam napomannassa tunuam!"
⁶ Langi' umpa'patandaam undu' lolläNa Puang Allataala,
 aka Ia ma'kale to mahhotto'. Sela

⁷ "O mentu'nako umma'Ku, patanannii talinga, la ma'battakadaä',
 o to Israel pehingngii, Kao la mendadi sa'bi diona kalemua';
 Kaom too inde Puang Allataala, Puang Allataala to umpenombai!
⁸ Taia kahana tunuammu napolalam kupassalako;
 taia kahana tunuam ditunu mampu' tamonda takattu
 umpehumalasang dio oloKu.
⁹ Tä' kupahalluam sapim laki illaam lentommu,
 battu haka beke laki illaam bala tanamu,
¹⁰ aka Kao puäna ingganna olo'-olo' illaam pangngala',
 anna mentu'na patuboam längäm massa'bu-sa'bu tanete.
¹¹ Kulise'-lisesanni dassi längäm tanete,

anna ingganna menabanna lako kaliane Kao umpuänganni.

¹² Hapanna la tadea'ä', tä' manggi' kutulasangko,
aka Kao puäna lino sitonda issinna.

¹³ Bale sapim laki isanga si kuande?

Haha beke laki isanga si kuihu'?

¹⁴ Pakende'ko pa'kuhhusam sumanga' mendadi bua pemala'mu
längäm Puang Allataala,

anna lendu'iko hempe pudu'mu längäm To Handam Matande.

¹⁵ Pengkaalako mai ke illaangko kamasippisam,
la kulappasammako too, lambi' umpomatande sangangKu."

¹⁶ Sapo' lu lako to tama'Debata ma'battakada Puang Allataala
naua:

"Aka umpolalam umpa'tula'-tula' kada kupandam,
anna umpobungam bibi pa'dandiangKu?

¹⁷ Aka untumpu pala'ko pepakilalaangKu,
anna umpaiboko'na battakadangKu.

¹⁸ Maka' solako to maboko, mabokoko duka',
anna sangkalama'ko to ullullu' pa'bannetauam.

¹⁹ Umpobungam bibi tula' kadake,
anna umbungkeko'ko lilamu.

²⁰ Angga unghähä untula'-tula' kadake solasubummu,
anna umpakolo'-kolo'i siundu'mu.

²¹ Susim too panggauammu, sapo' kupengkamma'i mandako;
ussanga hiko la susi siangki'.

La kupassalako,

anna la kulapisanni inde kaha-kaha dio olomu.

²² Paalai penaba inde tula'ku, o inggammua' to umpa'pa'dei Puang
Allataala;

indana kubiti'-biti'ko,

anna tä' sia deem la umpesäkäiko.

²³ Menna-menna umpakende' pa'kuhhusam sumanga' mendadi
bua pemala'na,

iam too umpomatande sangangKu;

menna-menna muola lalam malolo,

la kupaitai kasalamasam buttu di Kao Puang Allataala."